

文

雅亭集
利



雅亭遺稿卷之五目錄

文

宋史筌編撰議

武藝圖譜通志凡例

武藝圖譜通志附進說

兵志周軍制論

兵志唐軍制論

兵志明軍制論

兵志備倭論

奎章全韻凡例



祭妹徐妻文

祭友人文

羅統禦使逸事狀

六書策

返夢菴上楔文

奎章閣臣等謝曬書日

宣醞箋擬撰

閣臣等進御定奎章韻瑞箋擬撰

測雨器銘并序

龍珠寺柱聯

雅亭遺稿卷之五目錄終

雅亭遺稿卷之五

完山 李德懋 懋官 著

文

宋史筌編撰議

先是

上在春邸以宋史煩冗視膳之暇親御朱墨

而筆削之釐為八十卷名宋史筌御極之後命直提學沈公念祖撰義例甲辰公除積城

命携至官更加校正凡四年始完義例中亦有承命追改者

宋史之厖雜其弊有二總裁之不學也撰進之太促也總裁脫脫稍有學識而阿魯圖則其自奏曰臣素不讀漢人文書未解其義云其鹵莽如此至正四季始纂宋遼金三史翌年進呈其忙迫如此柯維騏宋

史新編閱二十年始成惜乎其不傳也修史官揭傒
斯附歐陽玄之私情違楊維禎之公議并列遼金以
爲三史玄非外藩人主論乖刺其罪不容誅而維騏
新編始辨正統功亦不少也歟

帝紀志傳之綱領也記大事者欲其統會立書法者
欲其謹嚴而宋史本紀尤失體裁故芟其冗衍務歸
精約汰其疊複庸期齊整間以續綱目續通鑑補其
闕漏

南郊園丘其號雖殊其所祭天則一也本紀或曰南
郊或曰園丘極其錯雜故并改南郊

本紀中皇后太子崩薨必書而妃嬪宗戚之薨卒不
書宰相執政之在位而薨卒者必書以知替代其他
諸臣不書薨卒

本紀所載詔命小事祇稱詔云云命云云而事實稍
多者或稱詔以云云或稱詔曰云云

本紀中宰相執政拜罷考其年月一一書之本紀本
傳及宰輔表互有異同詳略不齊故細加攷証期於
歸一本紀中外蕃朝聘使价往來無遺書之而遣使
賀外國僞太后生日則曰遣某使某國賀其母生日
舊史稱太后稱生辰甚至禮志有曰大中祥符二年

北朝皇太后告訃使來今改以契丹主母殂告訃使來

陳壽作三國志創立先主後主之號顧炎武以爲今之君子旣非曹氏司馬氏之臣不當稱昭烈爲先主其言可謂明白痛快炎武又稱後主爲末帝蓋因劉知幾論後漢書劉玄列傳以爲東觀漢記筆客或諂於當時後來所修理宜刊革之言而發此議也嘗攷萬斯同撰宋季忠義錄有恭帝端宗末帝本紀炎武斯同皆明之遺民也其論議撰述實有深意故今修史筌不曰帝昺特書爲末帝焉

后本紀以妃追冊爲后者亦載于紀而惟祔太廟者預焉至若真宗潘后雖不祔廟乃是潛邸之夫人故特載紀中如仁宗張貴妃之類雖曰追冊爲后卽一寵妃而亦不祔廟故不爲立紀而附之

年號之大中祥符太平興國祇稱祥符興國甚無謂故一一具書亦有年數加書者假如景德但有四年而或稱五年之類甚多故指一釐正

宋之官銜最爲冗長官至宰輔者或有事實無多而履歷連書幾至二三十行故段段以歷官某職累遷某任爲例務從省約

宋史生澁如韓琦傳不入中書堅辭位堅改以固王
嗣宗傳會愆雨改以會天旱王古傳墮崇寧黨籍墮
改以罹薛良顯傳贈恤良渥良渥殊厚之謂而欲典
反陋故刪之王曙傳隋東臯子績之後也改以唐大
樂承績之後也查道傳深信內典改以深信佛書徐
起傳賑餓殍餓殍是僵死者安用賑活改以賑飢民
聶昌傳本厚王黼改以素善劉易傳討定彝器改以
鑑定如此改正不可勝記

宋史脫漏如何桌傳金人再邀欽宗欽宗有難色桌
與李若水以爲無虞勸帝行此一段見落而論曰再

諸金匱臬實誤之與傳相違考通鑑續編欽宗再幸
事補錄劉應龍傳祇書知崇寧縣不書他官履歷中
間忽書按劾丁大全致大全傳有監察御史劉應龍
請加竄云云遂添書監察御史於應龍傳至若劉琦
錢顗傳不書登第及他般出身之事而官則侍從也
如此者無路填補姑闕之
宋史重複如韓綜傳末旣書子宗道爲戶部侍郎實
文閣待制因書綱子宗彥云云又書綜子宗道歷官
至戶部侍郎實文閣待制滕宗諒傳附劉越而越傳
中又附宗諒宋綬傳第三行旣曰博通經史百家下

段卒後又書博通經史百家如此處逐一刪改至若
韓熙載既載于南唐世家諸臣傳又載于文苑傳故
文苑所載者拔之林寔既載于儒林傳又載于忠義
傳今刪忠義所載而移載于文苑程師孟已載于列
傳第九十又載于循吏故循吏所載者拔之

志傳中廟號初現書某宗其後累現祇書帝若更一
朝則又書某宗及帝如例

宗室世家依王維儉所定宋史增理宗考榮王希瓚
而希瓚無事實可書考宗室世系表自冀王惟吉以
後七世及理宗即位追封榮王事爲傳附載于燕王

德昭之派宋史第四百十三卷趙汝談等七人連書立傳全沒體裁亦考世次移附于各派之下

外夷傳在在譌誤而高麗尤甚年紀名號動輒紕謬事實俗尚舉皆顛錯故以高麗史王世家爲標準而改撰焉

高麗西夏遼金蒙古雖曰外蕃係是大國故俱有總論其餘蠻夷仍舊史不爲立論

李全卽一盜賊而其傳分上下編凡三十六版楊慎譏其文弊今刪汰爲六版

程珦朱松事行學識真正名儒而至若珦識周敦頤

於獄掾因與爲友後又薦官使其二子從遊焉松私淑楊時托其子於所善胡憲劉勉之劉子翬有宋之大闡儒學寔二人之功也然宋史道學儒林不爲珣松立傳大是缺典故取其行狀別立二傳

藝文志書名之錯繆卷數之譌缺撰人之舛誤部居之荐複一一釐正以馬端臨經籍攷鄭樵藝文略叅互攷証祇取宋人編纂者而御撰諸書必錄之于部首諸臣所著不盡拘時世次序至若撰人名亡及有書無卷者別附于每類之下而詳註焉

宋史當別立傳而不立者甚多故詳攷分別如樂史

自樂黃目傳剔出立傳于文苑王則自明鎬傳剔出方臘自童貫傳剔出而立傳于叛逆之類也

儒林傳胡寅胡寧胡宏李心傳道傳兄弟次序倒錯故釐正大抵親屬知舊混載傳中當附而不附者另揭傳外不當附而特附者故隨輕重而正之

天文志雲陰之陰字或曰陰或曰霽而霽與陰一字故舉改以霽他皆倣此

高俅本蘇軾小史因王詵得幸於徽宗官至使相而能不忘蘇氏佞幸中稍具人心者也採摭王明清揮麈錄所載俅事別立傳補佞幸

元吳立夫撰桑海錄明程克鄴撰宋遺民錄李小有撰廣遺民錄萬斯同撰宋季忠義錄今其書不可得而續則博採羣書牽連而書之爲遺民傳嗚呼宋社已屋而版圖盡爲虜有惟遺民者隱忍畏約孤行孑立嘻嘻咄咄如癡如狂隱然爲蒙古之勍敵何其壯歟讀遺民而不歔歔飲泣者非忠臣志士也

李楷曰宋之存亡爲中國之存亡旨哉言乎然蒙古匪惟亡宋亡中國而已實亡宋史與中國之史也史筌之作紀二帝傳三虜添姦臣蒐遺民此其大綱王者之起必有取法者矣是奚但存宋史抑亦存中國

之史也與高皇帝廓清元虜再闢乾坤匹美偉烈
猗歟盛哉

剏業之君追尊先世昉於有周而漢之高祖只生尊
太公爲太上皇肇稱極尊之美號洵爲萬世之典禮
當是時昭靈夫人雖不在世而係是高祖之父母則
太上與帝等而昭靈與后齊也然司馬遷史記不立
紀傳蓋理不可屈而史不可私之微意存焉魏志晉
書始置操懿於本紀之首何其悖也宋史追尊四祖
不立本紀而略叙於太祖之紀惟杜太后則載於后
傳之首是由生時得稱尊號而然也歟然則匪惟有

違於遷史之微意或以太祖父母之存亡低仰其史
法則乾坤之位不定矣帝王之孝不全矣若倣金史
別撰僖順翼宣四祖爲世紀置諸篇首仍列叙崔桑
劉杜四后於諸后之紀尚或可也然其事蹟不可復
攷則今於杜后本傳各以事類分編於太祖太宗本
紀之中亦惟愈於闕宣祖之紀而存杜后之傳也
公主之號始於周之中葉嫁女于諸侯以天子至尊
不自主婚故使同姓者主之謂之公主歷代因之宋
朝襲漢唐之制帝女曰公主姊妹曰長公主諸姑曰
大長公主或以美名或以國至祖姑而或加兩國政

和三年蔡京建議始改公主爲帝姬加以美名二字
易國名四字易兩國名列朝諸公主皆追改爲帝姬
焉周姬姓故謂其女曰王姬其時諸侯如宋齊之女
亦不曰姬而各氏其姓曰子曰姜今宋之趙氏系出
於嬴則不當稱姬也明矣蓋王安石以周禮爲理財
之書如行青苗之類皆有所因而京紹述安石期盡
行之園丘方田之類是也至於改公主爲帝姬而極
矣京又請免茂德帝姬見舅姑行盥饋之禮徽宗不
從焉噫小人之心殆不可知也南渡以後始復公主
之號故公主傳惟徽宗之女稱帝姬以見一時之制

云爾

武藝圖譜通志凡例

已酉五月 命公及朴檢
書齊家同纂詳見于附進

說

韓嶠武藝諸譜六技一卷並前後增總二十四技

賜名武藝圖譜通志今既蒐輯衆技博引羣書奄成一統其於名例若不改正則本末易混主客莫辨故做大典通編例隨其舊新標以原增其目則以小字書於下其文則以大字標於上既標於上則雖更端不爲疊標互蒙上文然後命名通志之義始爲明晰若有辨証小則句間雙書案云云大則別行低一字

書案云云凡原增字案字皆加匡白文宏綱細目悉
稟 睿裁

博攷 列聖朝建置軍門編纂兵書及內苑試閱倣
前史本紀年經月緯逐事排次命曰兵技總叙別爲
卷首但古今所記詳略不同故無年者只書某朝
無月則姑闕焉內苑試閱之逐年疊行者曰歲以爲
例參差不一見者曰後亦如之至若 御苑御堂之
或書或不書槩從試藝日記
兵技不出刺砍擊三法故今以槍刀拳三技爲首各
以類從交戰出於倭劍因以附之馬才近于擊毬次

其下騎步冠服圖說又次之各營技藝傳授各異作
考異表附于末

參閱諸書器械圖式若有製樣可以取法勝於今式
者則先圖華式次圖今式又有倭式則次于今式以
備照式改造

原書器械圖解皆從戚書截出而圖傍縱橫細書者
此編或展爲大書故節略湊合之間或有一二字倒
插更定者取其語簡意完

戚氏紀效新書茅氏武備志俱爲是編之表準匪比
他書之泛引者故他書則曰某書曰云云至於戚茅

之書特書戚繼光曰云云茅元儀曰云云匪曰卑之以示慣申習尚之意又撰戚茅小傳載于卷首俾人知其事實

採撫韓嶠事實訓局緣起合成案說一篇載于技藝質疑之下使前人勛始之功久而彌彰

此書欲使將領卒伍人人曉暢故或有僻字奧文另註音義至若人物輿地器用動植之倫約略註解而平常者不足費釋稀僻者不必強疏用除繁蕪務取清簡

槍制宜審桿材劒制宜審鐵品故古今各國桿木及

煉鐵之法並次槍劒之下以資擇用

原書有藤牌而今制無鏢槍蓋刀鏢與牌相隨然後可攻可禦今附刀鏢于藤牌之下

雖非今人所肄習而如劒勢及棍法拳法可資擊刺者博攷諸譜各次其下

舊圖或有左右失勢長短違式者今逐段審究人物則別其衣紋向背形名則辨其圓尖鏤漆

步軍冠服舊圖依戚圖帕首急裝不解其色樣今皆釐改

舊書所繪各技步軍一張一面或二或三或四人數

不同眩於究審今則一張兩面各作上下兩格上格書各技之勢下格繪人無過二箇馬上諸技依舊一面只一人

圖在下而譜在上譜說不得不隨圖分合步軍則雖並立一面而有別爲一勢者必圈其譜以別其第二人如倭劒千柳流柳彼流銳刀舉鼎點劒之類是也其在初行不與上文相連者不圈馬軍則有連上交總結之語而文旣分屬有若專屬下段者然如月刀左顧一揮下有右顧一揮者三次之類是也此則又當連上文看

舊譜有散圖而無合圖今倣武備志諸勢總譜例作譜而武備志之圈書勢名者悉代以圖又依輿圖百里尺灋承以棋盤影格以均步法

舊書總譜退則順書進則逆書殆有甚於貝葉之旁行今悉圈其勢名綴以墨線隨其地勢書其起終使縱橫環轉逐路尋線瞭然可得

原書諺解錯置圖譜之間未易繙閱今剔出諺解另編一書附之可以便覽離之亦足單行且其話頭古今有異都鄙相混故一一釐改而器械制度及新撰解說姑不翻譯以就要約

銳刀旣以茅氏勢法爲圖譜而與今連習之譜迥異故不得不以今譜別作總譜又別作茅說解使已習者不廢所學未習者知有所本

棍棒甲乙之勢最多相類故刪其文只曰某勢至某勢同上云云而諺解則欲令易曉故並依本文疊書

武藝圖譜通志附進說

本朝兵制始備於光廟浸盛於孝廟而逮我

聖上宏綱細目莫不畢具凡郊幸大閱以外武臣之角射衛士之較藝歲有恒期月有常程萬幾之餘以試以勸大聖人不自暇逸貽謀經遠之略可謂盛矣

上之十有三年己酉秋 上召諭臣德懋臣齊家臣
東脩等曰武藝諸譜所載棍棒藤牌狼筓長槍銳鈚
雙手刀六技出於戚氏新書而 宣廟朝命訓局郎
韓嶠遍質東征將士撰譜刊行者也 先王己巳
小朝代聽庶政歲己卯命增入竹長槍旗槍銳刀倭
劒交戰月刀挾刀雙劒提督劒本國劒拳法鞭棍十
二技纂修圖解作爲新譜語詳 顯隆園志予卽昨
初元聿追 先志始命並前十八技肄習試取又增
騎槍馬上月刀馬上雙劒馬上鞭棍四技今又以擊
毬馬上才附于其下猗歟 列朝編纂兵書建置軍

營締造鞏固計無遺策然器仗之式擊刺之法顧未有詳傳騎曹訓局御營諸軍或習焉而勢有同異踵訛襲謬非細故也及今無事之日編成有用之書則敵愾禦侮可期實效茲以武藝新舊譜二十四目盡畀爾等看詳編摩賜名武藝圖譜通志爾等其博蒐廣考以爲疏解發凡起例正其體裁凡厥得失亦復論斷使其段落更端毋或兜攬混淆俾揚前輩之美意毋貽後人之譏議焉因命開書局于壯勇營出內府兵家二十餘部以資考檢亦有名物事文可以旁引百家者命臣德懋繙閱閱古觀秘書臣齊家則撰

輯之暇繕寫鑄本臣東脩與營校之知兵者察試技藝董飭閎雕三閱月而工告訖書凡五卷臣等竊伏惟念古之以書生談兵者若杜牧陳亮唐順之之流皆能通經學識時務口陳手畫磊落慷慨讀其書凜凜猶有生氣至如我朝之韓嶠白衣爲郎世推國士無論其有開創武藝之功卽其周旋於駱千斤劉大刀之間者已足以發奇偉之觀而長志士之氣矣臣等碌碌學未通方才不適用方之古人無能爲役於萬一而惟我聖上思深聽鼓歎發撫髀搜幽闡微惓惓於韓嶠之書至使臣等發揮潤色流布永久編

摩之際輒飭臣等毋或掠其美而掩其善大哉言乎
臣等每奉 聖諭未嘗不攢誦而激昂使嶠而有知
寧不鼓舞於泉下也臣等謹考班固次兵家流權謀
形勢陰陽以外別叙兵技巧蓋習于足便器械積機
關以立攻守之勝者也新羅之武烏兵法高麗之金
海兵書逸而不傳今不可攷而中國歷代器械之書
亦或不傳言制造者莫詳於考工記而辭義奧邃六
韜有兵用篇略而不備惟宋朝曾公亮武經總要兵
器圖式最號精該王氏圖會戚氏新書茅氏武備志
及圖書集成戎政之典咸宗是書而韓嶠之書旣出

戚氏源派明白有圖有譜按而行之如指諸掌亦可謂有用之學矣或曰兵者智謀而已矣陳猶末耳況於器哉故曰運籌帷帳之中決勝千里之外彼回旋踊躍噓號示勇者一人之敵耳奚有於勝敗之數哉是則有大不然者嬰兒持劒責有避匿者畏其器也孱夫之一擊勝於勇士之百打者得其勢也故有謀而無陳與有陳而無器有器而無勢均之不可以爲兵方其兩陳相接彼之刀必剗而我之鋒已折敵之甲不穿而我之矢已鈎當是之時雖使玄女握機風后司命猶鷺鳥之鍛翮猛獸之剪爪將無所施其智

謀矣此圖譜之所作而爲今日之急先務也是書旣以列朝所撰兵書該載卷首而當宁御纂兵書如兵學通津陳總方已刊頒者外內府謄本猶數十餘種臣等循次編錄則上以事近夸耀不許至矣哉我聖上撝謙之德也蓋嘗論之兵學通爲營陳之綱領武藝通志爲技擊之樞紐夫通者明也該也體用互須本末相維談兵之家捨此二通亦奚以哉譬之於醫推驗運氣診察經脉陳法也草木金石器械也烹炮劑研擊刺也若曰運氣經脉識其大而已安用彼區區藥料之佐使云爾則庸師而止耳夫我

國之人讀書者徇空虛而略名物制器者溺見聞而昧度數百藝窳荒不師古昔雖有忠智強力之臣徒手馳騫何補於事哉今我聖上撫熙運而御至治文置奎章武設壯勇神明禮樂煥然改觀破膠固之習適弛張之宜以至一藝之工一事之微莫不濯磨淬勵綜核名實則通志之書特制作之一耳雖然百工之事大抵皆出於聖人故三代之器逾古逾巧古之名將皆有巧思史稱諸葛簫袖鎧五石弩射之不入都穆評漢槍精緻歎古人作一器未嘗苟且今我國方數千里據山海之利地非不足矣倭人購晉州

之鐵鍊成寶刀哥舒二年之木北使得之以爲珍則
材不改求矣駱尚志曰以一教十以十教百數年之
內可得精卒數萬則民不異於曩昔矣苟能董百工
以治其器募良師以習其藝凡在登壇制閫之列荷
戈執受之流悉能按圖考譜通其術而究其用則可
以策全勝於不戰垂鴻烈於無窮國需楨榦之材家
播干城之詠矣夫獅子弄毬跳跟偃仆終日不休及
其搏象搏兔皆用專力者毬之所推也倭人燕居前
置藁枕手把木刀閒漫擊枕以習其勢技安得不神
乎夫兵不得已也然聖人用之以禁暴止亂之義則

未始不與利用厚生相爲表裏故春蒐秋獮所以簡其馬也鄉飲之禮所以習其射也以至投壺蹴鞠之戲莫不有微意存於其間則是書之作又豈特兵家之一事而已哉推而廣之凡農圃紡織官室舟車橋梁城堡畜牧陶冶冠服盤盂民生日用之具所以事半而功倍者舉將牖其迷而導其俗紹周官之遺則襲華夏之舊制朝廷講實用之政黎庶守實用之業文苑撰實用之書卒伍肄實用之技商賈通實用之貨工匠作實用之器則何慮乎衛國何患乎保民也哉臣等躬逢右文猥承纂次之任豈直爲托名文字

之榮而已萬世昇平永賴我 聖上止戈之化云爾

兵志周軍制論

辛亥七月

命纂輯

國朝兵

制開局於秘書省與柳檢書得恭
朴檢書齊家同纂其歷代外國兵制
下段各附論說公有周唐明倭四論

王宮內外不可不嚴密故周自文王以來謹於內治
宮正宮伯罔非正人綴衣趣馬亦惟吉士非王族則
皆功臣之世與賢者之類爾是以奉燕私則從容養
德司禦侮則堅明守義而虎賁八百人即天子之親
兵祿比下士足以代耕與六鄉之軍無事則散有役
則召不同焉者重宿衛也夫天子六軍見於夏書胤
侯之征而大司馬之職唐虞之際闕焉無聞以其古

者兵刑合爲一官然夏承唐虞則古亦有司馬之官而其制不可攷也制軍之政至周大備以田定賦以賦出兵征伐隸之司馬伍籍屬之司徒居則爲比閭族黨州郡出則爲伍兩卒旅師軍故寓兵于農寓將于卿父子相繼無招募之繹騷而額不缺耕稼自給無廩餉之經費而食常饒有事調兵則天子以一牙璋發之六軍之命制于至尊事已則爲軍將者蕭然釋兵亦何患乎久握戎權飛颺跋扈有如後世所謂強臣也哉若其聯比挨次大小相維六鄉在於百里之內而爲正軍六遂在於百里之外而爲副倅合之

則當爲十二軍而以其迭用故常時祇是六軍七尺六尺之征以其才也六十六十有五之舍以其齒也每家惟取一人爲正卒其餘皆爲羨卒以備更休皆寬民之力而亦有校閱之制田獵之禮坐作進退以講武也刺伐擒縱以簡衆也可見聖王居安思危之意吁其至矣蓋成周制軍之法此其大略而萬全無弊可謂盡善然迨及數世司馬世官爰以命氏駟至諸侯更霸列國專征世卿帥師大夫蔽甲孔子作春秋凡書帥師譏權臣也聚民而爲兵兵安得不惰聚兵而專將將安得不驕魯之丘甲齊之內政晉之三

行鄭之丘賦楚之荆尸逾變改而逾僭擬蕩然無復周王之制至於秦之上首功而生民之禍慘矣

兵志唐軍制論

府兵之制昉於周太祖輔西魏時用蘇綽言倣周典置六軍合爲百府隋因其舊定其制爲十二衛至唐而始備以二府統十二軍以十二軍統六百三十四府三代以下之兵制未有如府兵之善者其爲利者八中外相制上下相維一也民無失業可以省養兵之費二也兵有定籍可以省召募之煩三也無事則散耕有事則聽調三代寓兵于農而府兵則寓農于

兵是兵農雖分猶不分四也更代番休無長征久戍之兵而民力不困五也兵興則命將兵罷則將歸于朝釋握兵之權六也兵不精者罪其折衝與刺史責任既專則士皆素鍊七也兵皆土著而安業顧戀宗族人自戰家自守無逃亡轉徙之患八也高宗以劉仁軌爲洮河鎮守使以圖吐蕃始有久戍之役武后以來昇平日久府兵漸壞爲人所賤百姓耻爲之牛仙客以積財得宰相邊將效之誘戍卒以繒帛寄府庫晝則苦役夜繫地牢利其死而沒入其財戍卒還者十無一二張說請募長征兵謂之彊騎此府兵之

始變也天寶以後曠騎之法又變廢而折衝諸府至
無兵可交李林甫遂請停上下魚書其後徒有兵額
官吏而戎器糗糧并廢此府兵之再變也李泌欲復
府兵而未果也憲宗中興亦宜復舊急于近效不爲
遠圖惜哉自府兵壞而方鎮盛玄宗之西狩代德之
播遷所藉而興復者方鎮之力也能禁方鎮之不强
盛而逆命得乎方鎮旣盛而天子失權恃以自衛者
惟禁軍安得不增置羽林龍武神策神武等諸軍乎
方鎮之盛也甲兵險要財賦人民舉以委之悍將得
兵權以劫天子禁軍之盛也藏姦民蕃逋逃無勝兵

而存空籍又諸軍皆以宦官主之僖宗以後方鎮與
宦官相爲仇讎天子右宦官則召外禍右方鎮則啓
內釁推其原則皆廢府兵之故也蓋府兵耕戰之兵
也曠騎召募之兵也耕戰之兵廢則召募之兵起府
兵之壞壞于天寶之怠荒非曠騎之禍也

兵志明軍制論

元起沙漠兵制簡略不可爲法故 皇明接元之後
而未嘗因元之舊蓋 太祖久歷戎行洞悉古今之
利病斷自宸衷制爲畫一之法自京師達於郡縣皆
立衛所外統之都司內統於五軍都督府而上十二

衛爲天子親軍者不與焉征伐則命將充總兵官調衛所軍領之旣旋則將士所佩印官軍各回衛所有唐府兵之遺意衛所都司猶唐之折衝府也五軍都督府猶唐之二府十二軍也其法最爲盡善唐一變爲彊騎明一變爲團營皆不得不變者也然初制不可復獎遂以痼團營之制簡精銳一號令兵將相習其法頗善而歷累朝更營制威益不振 毅皇帝集九邊家將突騎數萬人聚京師號威武營 帝自爲大將軍而十二營之號固自如嘉靖初兵政廢弛邊報歲益急團營見兵少僅選三萬騎號東西二官廳

而團營所餘者非老弱則入元帥中貴之私家後罷
十二營復并爲三大營然弊源已深不可以救矣大
抵衛所之兵疲於番上京師之旅困於占役馴至未
造尺籍久虛行伍衰耗流盜蜂起外蕃充斥宦豎降
於關門禁軍潰於城下而國統遂墜矣

兵志備倭論

日本地形如人字遶我國東南二海東海比西海尤
深常多大風水性悍急絕無島嶼無以避風經宿且
白頭山大麓濱海而北迤南走自慶興至平海無一
平地故東海自古無邊虞惟高麗高宗戊午東真餘

孽以舟師來圍高城之松島而已自文宗以後倭寇始作而止於嶺南海沿忠宣時至犯湖南之羣山楸子等島忠定時至犯京畿之三木紫燕等島恭愍時至於海西之鳳山關西之宣川大抵西南海沿無歲不侵而關北嶺東一不入寇至恭愍二十一年始自咸興轉入北青爲萬戶趙仁瑩擊破二十三年寇江陵及東界諸郡辛禡九年又自江陵入淮陽至洪川又入咸興端川洪原北青我太祖征之大破於咸興之兔兒洞此非陸奧伯耆之倭直渡東海者而乃平島對馬之賊來自嶺南寧海丑山島而入寇焉陸

奧最近我國倭人言壬辰秀吉之入寇也時未得薩摩故不敢從一歧欲從陸奧以北而別有海路浦泥沮洳鋪竹籬四百里欲渡兵馬猶畏其陷溺而未果云日本東北海中有蝦夷國一名獲服一名日高見國又號毛人國其南海浦名松前卽志摩守之城居至陸奧之津經海上一百五十里自松前至曾宇夜三千八百里卽蝦夷之北界至加良不止島四百三十里卽與靈古塔東北三千里飛牙喀地方相接飛牙喀人衣魚皮以犬負載地常泥濘一人足踏舉地皆動菰蒲彌滿居人乘橈以取鴈卵蓋倭人指此地

謂秀吉鋪籬欲渡遂誇耀我也蝦夷衣獸毛飲魚
脂鬚長如蝦行無足音登高行險捷於禽獸能行水
底勇悍無比箭藏頭髮刀佩衣中草烏頭藥塗鏃射
人肌膚腐爛急剥瘡皮研傅生蒜始得不死嘗侵掠
日本王子武尊討平之仍爲奴國壬辰之難加藤清
正深入北關獲松前人世琉兜宇須者其人風飄留
居濟州二十年清正得之甚喜以嚮導改名後藤次
郎近世東萊人亦嘗漂到蝦夷而還則蝦夷之境與
我北關相近籌邊之臣不可以不知至若阿蘭陀雖
非我之隣近亦不可以不虞一名荷蘭一名紅夷亦

曰紅毛在西南海中距日本一萬二千九百里其地
近佛郎機深目長鼻鬚髮皆赤足長尺二寸常舉一
足而尿如犬習西洋耶蘇之教其所恃惟巨舟大礮
舟長三十丈廣六丈厚二尺樹五桅或八桅置二丈
巨礮發之可洞裂石城世所稱紅夷礮卽其製也爲
海中諸國之患 明末據臺灣後爲鄭成功所敗嘗
往來交易于占城叭哇等三十五國自爲都綱每年
六七月船載各國珍品異物來泊長碇互市倭人以
我國人蔘訛爲土產而餌之博其重貨 孝宗四年
有漂船泊于珍島渰歿幾半餘者三十六人轉泊濟

州不通言語文字我人但稱西洋或稱南蠻竟不知
爲何國人先是有吉利施端者從蠻舶來泊日本島
原以耶蘇之教誑惑民衆祝天廢事惡生喜死關白
家康捕斬之小西行長亦坐誅 仁祖十六年行長
家臣五人被竄于島原者復煽動邪教徒黨至三萬
六千人襲殺肥後州太守關白發兵剿滅仍約我國
訶察餘黨之往來海沿者至是濟州人見漂人試以
倭語呼吉利施端則漂人皆歡喜 朝廷遣譯人朴
延來審延亦漂人隸於訓局本名胡吞萬改稱朴延
延見漂人叙話垂淚漂人皆願服屬遂分隸于京外

諸營有善星曆者及善鳥銃大礮者十四年畱置全
羅左水營者八人潛乘漁舟逃至長碕對馬島主書
契有曰阿蘭陀卽日本之屬郡而今畱貴國者八人
逃來長碕又曰其餘畱在貴國之人必是學習耶蘇
者執言恐喝要索權現堂香火之資我國雖始知漂
人爲阿蘭陀而亦不深辨其非日本之屬郡也日本
狡悍爲我強隣而駕馭蝦夷牢籠紅毛唯其指使如
虎傳翼天下之事變無窮而患生於所忽平常無事
之時不可不商確四方蠻夷之情狀亦不可以窮遠
荒絕忽而易之也

奎章全韻凡例

壬子三月以塲屋頒行韻書多命改撰務令繁簡適中

乃以四聲分四層古叶古通多取邵氏韻略

三韻通考未知緣起似是世宗朝命儒臣編定者
至今爲藝苑之懸法且其三格橫看倣古表譜之例
至爲簡要然但四聲昉於沈約則硬定三韻名實不
協故今定四格併編入聲今韻平聲三十部入聲十
七部章黼韻學集成始以十七部分係于三十部蓋
入聲雖是閏聲究其中聲犁然調叶但支微齊佳灰
魚虞蕭肴豪歌麻尤十三韻無入聲今定四聲概從
章氏而閣臣徐命膺編奎章韻瑞已有此例

三韻通考蓋出於禮部韻略韻府羣玉洪武正韻諸書而所收至約註解不過二三字操觚者奉爲甲令士不宏博諒非異事金濟謙與成孝基同編增補洵爲近正無論原韻增韻間有稀僻不刪一字者以其行世已久人皆貫串也故今又續補仍與舊增彙次于各韻之下較今中華所用古今韻略康熙詩韻不甚零星反復勝焉註解則博證羣書較舊頗詳如舊註只稱木名草名水名地名之類已極疎忽其餘事物名義蓋多脫漏逐字添註略悉梗概字體則壹從正韻字典點畫偏旁往往釐正務盡謹嚴以爲朝野

之模楷

蒙古亂華音韻舛譌 高皇帝既定天下命宋濂等
壹以中原雅音更定之今編韻書就洪武正韻字母
而從四聲通解諺翻之音東音則律之以字母之法
各字註解之下以諺字書華音園匡東音方匡俱鐫
白文不煩更書見溪等字母德紅等翻切而一諺字
足以該括亦甚簡便近世一種韻書以諺字大書東
音其下小書華音位次倒置有欠正名故一切改正
而不從

近世朴性源正音通釋華音則不刪俚音東音則特

揭俗音寔爲適用之書而今編韻書務從典雅故至若華音之兒音ㄣ二音ㄣ之類明是蒙古遺音併屬刪汰東音之俚俗者人皆自知何必更說然今編韻書爲詞林之木鐸正音通釋作鞆象之指南與之并行固不相悖矣

洪武正韻排韻俱用字母之次互相爲統今倣其例以諺書俗稱反切之次爲定一字互見於平上去入者字傍平則標○上則標●去則標D入則標■互見他韻者註部首字加園匡一韻內字同而音義不同者註諺音加亞匡同字異形者註全或籀或古或

俗非同字別義者全字下註別義異字通用者本義
下註全字一字而通用二字者書於二字之間註全
上全下

諺字一依四聲通解而俗所謂反切人皆易曉其中
另有字母音所用難曉者如全清精字用下照字用
入次清清字用入穿字用入全濁從字用入牀字用
入左右側畫互有長短隨字母而不同雖詳見於四
聲通解字母圖人或疑眩故姑拈數段以示概略侵
覃鹽咸四韻終聲華俗皆呼爲ㄣ而正音通釋從之
惟四聲通攷通解皆用口今從之

古昔有韻自六經始而屈原離騷揚雄太玄焦贛易
林莫不有韻漢儒皆能通曉沈約拘以四聲古韻失
傳唐人精通古韻者惟杜甫韓愈白居易柳宗元至
宋吳棫作韻補始有成書朱子嘗取之以釋毛詩離
騷邵長蘅韻略爲近世通行之書而各韻之下編吳
氏韻補及楊慎轉注古音與長蘅所自補若干條今
約略抄附俾藝苑墨客略識全帛之一竊至若按而
行之則顧炎武音學五書在耳茲故簡而不詳亦依
潘恩詩韻輯略例姑削註引只著書名且特揭翻切
不標諺字者若因翻切華音固可繹而不敢以諺字

勒定東音慎重故也

古韻通轉諸家聚訟平聲之庚青蒸侵皆可通真而真與先不相通入聲之陌錫皆可通月職緝皆可通質而質與月不相通此卽吳棫韻補例也近世詩人吳偉業最喜邵長蘅韻略證諸古樂府及杜韓詩又質諸李因篤顧炎武定以東冬江相通真文元寒刪先相通蕭肴豪相通歌麻相通陽無通庚青蒸相通尤無通侵覃鹽咸相通上去入視此爲例蓋亦不易之論今以次附于各韻之下

五七律絕謂之近體近者非古之謂也不許通轉格

法截嚴俗用一入一出謂之進退格或結句單通謂之平沙落鴈原係陋習不當效法五七古詩始可通轉而亦不必用古叶至於賦頌銘誄箴贊之類可以略用古叶譬如彝器之陳敦壘雅樂之懸鍾磬不廢古色古響東人全不察此強稱散韻唯口是矢縱有合作不可入選至如七言古詩押韻耀奇騁險以排奐爲致者不妨以一韻到底而歌行興托亦須迭用四聲每以平聲隔別然後音節頓挫古之作家大率如此

我東科詩頗具音調蓋亦古詩之流然古詩則通押

入聲科詩則一切不押豈非陋規且科賦不拘四聲
隨口通押命曰嘴韻無所顧忌至於增韻固多好字
如支韻之鱗字獅字之類及其見於經傳之字本非
迂僻而不敢通押亦甚無謂自今主試者詩則許押
入聲及增韻賦則依例通轉俾存界限期還大雅

祭妹徐妻文

惟我兄弟男女四人長汝六年我生在辛汝暨汝妹
丁卯戊辰功懋丁丑其生最晚不及見妹幼時婉婉
婉婉遊嬉森然在眼負必二肩攜必雙手餅餌中判
果菰半剖丹鉛粉墨分劑左右芳菲花葉句排北南

我念經史雙坐呢喃三綱五常并解同譚荒年艱食
先妣多病播遷江干歲在乙丙糝麴淘艾口刺喉梗
黃卷末醬燈影在糜殘肴腥鼻婢拾船鮪聚首數噍
以溫慈眉家君遠遊久或歸家諱說前飢恐挑新嗟
驩劇畏離守裾逶迤汝年二九歸于徐子徐子嶷嶷
丰韶娟美女令壻佳父母孔喜越明年夏先妣捐世
兄叫弟啼痛刻心肺較厥平日益相扶衛汝妹服闋
爲元氏妻各抱一子撫古心悽有懷則徃時月莫睽
憐汝邇來載飢載寒炭不熾爐食不登槃汝雖怡然
萎黃上顏嗽轟肺喉痰簇肩脅去年維夏邀汝藥汝

汝舅捐館汝哭而去冬又急病余往灌藥邀來于家
卧第咯咯歷冬跨春沈綿旬朔不敢久畱歸而謁姑
肉漸骨稜藥亦難扶暮春復歸難期回鮓家君衰晚
竭力以護厨則絕炊魚肉必具庶幾其啖在旁諦顧
孺人煮糜糜母抑搔婢子偶語揮手牢騷汝知不諱
心不搖搖汝妹來訣淚落汝腮汝只無言淚眼頻擡
我何忍見天日爲霾徐君來觀謂有何言答曰無言
勸君夕飡六月三日大雨陰昏昨夕今朝家人缺食
汝知顰蹙感病以之革送兒歸家奄然絕息老親依依
父子兄弟惟茲三哭天下至聲汝今大寐其聽不聽

家君按禮乳母浴襲我與徐君絞歛嚴急手爲之戰
顙泚漶漶汝之夫黨我之朋儔君子仁人贈賻聿修
渴葬九日歸于舅丘先妣四子各肖一像汝之肖妣
頽然其長我於先妣爰肖其顙汝妹肖語功懋肖髮
各自凝睇足慰悲怛不見頽然痛悼難遏每到汝家
汝必驩然爲人縫鍼篋收傭錢喚婢沽酒笑置我前
我澆它器勸汝汝承略分肴菜以啖阿曾今雖百往
觸目悲增汝妹今秋將移峽縣汝病方劇益篤愁戀
每年妣忌雙來叅見今年是日余益悲慟知汝不起
汝妹遠送明年此日二位俱空功懋五月取婦畿海

犀鞵烏帽爰習其拜病裏含愴婦歸難待事事傷心
我歿方忘爲吾弟者廿八星霜何嘗一日情義失常
徐君曰然爲吾妻者十有一載言談蓋寡天資澹靜
不煩而雅褊悍可戢躁薄可鎮妯娌姊姒穆然無釁
似此女行應永其胤阿曾五齡與汝疾同羸黃而嗽
如覲汝容摩之煦之庶慰汝痾平昔人言兄弟凡幾
曰四某某是係同氣從今人問爲四則未麻木不仁
如剮肉骨兄隣弟降弟慘兄切是理犁然有順無越
閱汝生死我則冤酷汝雖便宜我歿誰哭土坎幽黑
恐埋如玉嗚呼慟哉尚饗

祭友人文

彼佛有喻人生人歿泡沫芭蕉變滅如是泡雖善滅
尚有繼起蕉有宿根藹含生理今子之泡一滅而止
今子之蕉返綠難擬有逝莫回仍之無子一氣不傳
斯而已矣若或有嗣眉鬚宛似我時往抱諦想而喜
惟有墨蹟篋藏數紙思來一讀精神旖旎寒暄起居
僕從口裏密字疎行纔脫于指庶幾若覲忽焉難企
東門之東逶迤五里有楓聶聶酣霜而紫載酒同遊
佳約在邇曾未一月子胡至此葉惟餘妍酒尚新蟻
子獨大忘無聞無視名臣之後篤生善士品則祥雅

姿惟丰美士友心醉隱然爲倚期待珍重宜永福履
天而無胤名不載史紅旌蕭瑟銘彼末仕寒冬十月
而不畱軌操文一哭送子錦水冥冥恍惚子其側耳
羅統禦使逸事狀

公諱德憲字憲之姓羅氏其先豫章人後有浮海而
東遂籍羅州始祖高麗監門衛上將軍諱富主典農
寺正諱公彥佐我太祖征倭奴大捷于雲峰有諱
自康本朝務安縣監寔爲公五世祖生諱繼祖將
仕郎生諱逸孫典涓司直長贈左承旨生諱旺司
憲府監察贈戶曹叅判生諱士忱號錦湖尼城縣

監 贈左贊成師履素齋李仲虎 中廟褒賢孝

宣廟擢遺逸事載三綱行實克生六子人稱六龍公
其季也妣 贈貞敬夫人光州鄭氏僉節制使虎女
以公貴累 贈三世考妣爵如右公生于萬曆元年
癸酉六月自幼智慮沈深儀貌傑特鄭汝立逆獄起
錦湖公及公之三兄爲怨家投匭者所中公年甫十
七憤往斥之謀議者皆驚散錦湖公竟逮係 宣廟
特原之惟公則編配鐵原宥還業騎射丙申遭錦湖
公喪癸卯登武科文翼李公德馨薦公才諧拜宣傳
官出爲扶安縣監壬子授義州判官甲寅丁母夫人

憂服闋由水原府中軍陞通政丙辰滿洲酋奴兒哈
赤僭號後金將駸駸東搶公每憂憤願乘障自効已
未以北道防禦使兼吉州牧使秩滿轉宣傳官甲子
李适叛公佐都元帥張公晚破賊于鞍峴公後夫人
與元帥之妻爲姊妹元帥欲達于上加封賞公固

辭曰縱有微勞公則褒之必來人言大丈夫安可受
人之疑只錄振武原從一等除鳳山郡守戊辰移安
岳郡守庚午爲御史所誣逮係時檄島副將劉興治
殺其帥陳繼盛聲言皇朝有命而跡可疑本朝
議討之欲先訶探命擇可使者備邊司以公對自

獄中起攝刑曹叅議充接伴使入楸島則興治已移
駐旅順兩兄與基興沛迭相守島島中洵洵公便宜
應變鈎獲隱情陸續回啓遂命畱劄宣川鐵山之
間接應島衆辛未乃還壬申復授宣傳官癸酉充信
使赴藩金主列兵衛以見公不少動舉違約五條詰
責仍潛覘虜中之疆域大小兵卒衆寡器械苦良與
夫秣馬動兵之機歸拜定州牧使旋罷甲戌再以信
使赴藩會有譌言謂本國助兵明朝挾討金人
故辱公百端拘之數月公隨事開誘辨其非實又密
書虜情馳啓上特遣宣傳官往諭之金人始許還

公乙亥爲昌城府使仍除義州府尹遞付副護軍丙子二月以僉中樞復差春信使將赴藩至平壤遇金使龍骨大稱汗令請公還京待其竣事同往藩中公曰龍將之於汗令我之於朝命其不敢違一也時觀察使洪公命耆不受金使所帶西獫禮幣故金使尤悖慢以爲金汗已收大元五十餘王子天意人心有所歸屬故將擬加汗大號貴國爲弟大金爲兄兄既有慶弟不可以不知西獫之來爲講此事爾貴國王子弟固當來賀公曰西獫明朝叛虜何以齒我金雖加號何遽使王子弟來賀龍骨大竟以西獫行

果議加汗尊號宰臣及太學諸生交章請斬虜使童子投瓦石逐之搆兵之釁蓋自此始時公次于義州武宰李公廓亦以回答使至金使逃歸邀二使謂之曰我諸王子有書而貴國不受此何義耶公曰書果云何若係加號我國君臣誠不忍受金使曰朝鮮徒尊南朝不識天命我汗招降諸獫狁恢拓疆域尚不可以進位乎公曰我國臣事明朝二百餘年君臣之義炳若日星奈何以嫚語嘗我金使曰使臣入藩諸王子議加號雖欲不從得乎公曰吾雖首懸汗庭志不可奪遂與李公同到藩館龍骨大責以渝盟又言

朱氏皇覺寺一僧爾天下非一人之天下安得久據而有惟我汗待人以誠有戰必勝南朝刻薄其亡立待朝鮮服事可謂非計公曰我國雖小悖理之事不忍爲也龍骨大曰朝鮮聞我西犯請兵南朝謀乘我虛我且先犯朝鮮公曰西犯之計吾實不知安有合攻此金人先自渝盟亡何汗將出郊僭號俘譯鄭命壽請使臣往觀以試公意公拒不聽四月十一日虜數十騎來言汗欲受賀可整服而待公曰吾得死所遂與李公東向四拜壞紗帽裂團領因拔佩刀授命壽曰必欲刼我速斫我頸二公復相與解髮駢首綰

結交手指堅握鈎連而卧汗又使騎促執二公驅向南郊時汗已受僭號曰寬溫仁聖帝國號大清年號崇德八固山諸王子將校數千人排立左右兵威甚盛促公立班於是虜人麇至執公手脚拖拽橫倒髮鬚盡落幾不得呼吸時公年六十餘猶力拒如搏戰狀不暫撓脊以示不屈俘人旁觀悲不自勝潛畫沙中嘉公大節汗使人誘公曰參賀生不參賀不生公厲聲曰寧不參賀不生不忍參賀生於是鞭扑亂下血淋于衣地爲之赤俘人爲虜將者愍之曰兄弟之國使臣一拜害義者幾何而不自恤何至此公曰非

有君命雖死不敢俘人曰多也多也多也者歎美之
辭汗受賀畢拘公于館翌日汗出東郊又執二公龍
骨大曰今日不拜大受刑小拘幽公曰殺則殺囚則
囚爾仍大罵不絕口虜又毆之折右脅俘人廣寧摠
兵見公且歾密語譯官朴仁厚曰吾輩世仕明朝甘
爲俘虜雖不歾非人也今見使臣不屈咄我慚惶顧
不欲生遂止其毆饋盛饌公氣絕復蘇卧踴其器守
者失色汗又令拘于館翌日大會將議殺公汗兄子
要雕諫曰彼以歾爲榮若果殺之我有殺使之名彼
有成仁之節亦恐貽笑於他國汗遂不殺一日龍骨

大促公東還付汗書不許閱見公曰開見有前規今
不可受龍骨大迫置裝中使騎百餘押驅至通遠堡
而歸公自念汗書押以新印不可齎又不可以毀棄
乃渾藏白紙青布之笥負以一馬托堡人曰馬病裝
重姑送藩中以俟後日因使軍官馳啓邊上譌言公
參賀虜庭觀察使洪公驟聞之上疏請斬境上三司
及館學生趙復陽尹宣舉亦請按律時金公尚憲爲
吏曹判書力言二人奉使抗義甚明白罪不當斬
上命謫公白馬城李公宣川椽島都督沈世魁因俘
人聞二公不屈狀上奏皇朝有曰逆虜迫脅朝

鮮臣守義七月接伴使李必榮得奏本以啓臺論卽止然世或謂世魁敢欺皇朝噫人之不欲聞人之善而必欲殺公如此及馬夫達持通遠堡所歸汗書而至請加使臣不參賀不受書之罪宰臣崔鳴吉上疏言抗節不屈擲棄汗書昭在人耳目沈世魁至奏聞皇朝且德憲狀啓之來也廟堂議加褒賞及橫議猝發按以辱命之罪至謂世魁欺謾皇朝臣恐國家無以自解於皇朝時隨行譯官申繼黯等訴備邊司訟公寃九月上特命釋公居數月金汗大舉來圍南漢時公在羅州病斃不得扈從明年正月

上幸汗營汗問羅某安在向者苦不屈今不得相見
耶自是我人入藩者得公事尤詳承旨洪公命一以
質子歸言俘漢人有問二公謫戍信否曰彼皆不自
引決近乎辱命故罪之爾漢人曰出疆之臣見殺則
死不殺則不屈而已烏在其辱命因自指其頸曰只
爲惜此自毀名節不自引決我輩之謂矣正郎李穉
嘗見藩人壁上揭二公抗節圖烈皇帝因沈世魁
所奏遣監軍御史黃孫茂降勅褒諭于我而檄島已
破莫得以聞惟韓平君李慶全得其實而書報李公
甚詳至是公之誣稍稍伸雪上亦嘉之擢拜三道

統禦使已卯乃遞明年正月卒享年六十八葬于務安縣浮珠山公有二配咸陽吳氏全義李氏并贈貞夫人內外曾玄孫總若干人公性簡亢持身莊重耻苟容言議激厲詆譏者蜩起而不少沮然料事動輒如神龍骨大之來畱館也一日躍馬而逸人皆驚惑公急往見兵曹判書金時讓促令支供者往候于東關王廟曰此虜必陰覘南漢欲人不得測然歸必少憇廟中我若先迎候彼不敢謂我無人已而果如公言龍骨大撫然色沮公所謀畫往往出奇如此公沒後數年林忠愍慶業自登州至北京有人示公畫像

其受毆不拜流血模糊宛然如昨林公遂載其事於
日記後四十餘年公後孫零替不克有所表揚而世
亦浸與之相忘 肅宗十年甲子開城畱守李公選
應 旨上疏請加褒贈言言切至於是 上下詢大
臣領議政金公壽恒議以爲羅某大節卓然而往者
朝論橫激請罪太峻今若追加贈命可以勸勵人臣
之節 上命贈兵曹參判然朝野之記載或踵譌謬
傳聞久遠瑕瑜相錯貤爵之典僅止亞卿 贈謚旌
閭缺焉不修毅魂幽鬱烈士增慨者百四十餘年今
上二年戊戌不佞隨使臣入燕得見乾隆所製全韻

詩注有曰太宗文皇帝建號祭天列國來賀朝鮮使臣羅某李某獨不拜左右欲殺之帝曰彼守禮義而不屈殺之不可乃放還本國云文皇帝者汗也公五世孫璧天聞有此事且悲且喜歲己亥齋公遺事哀訴搢紳上聞之命特贈謚曰忠烈旌其門嗚呼危忠由是而益彰幽冤由是而快伸公議由是而亟定天彝由是而昭揭盛矣美矣無遺憾矣璧天以不佞於全韻詩事有與聞之功請記顛末余固不敢以立言自命略撮其家乘爲逸事狀

六書策

壬子八月

命公編纂奎章全韻書既成命閣臣尹行恣徐榮輔南公轍承

旨李書九李家煥校書校理成大中檢書
官柳得恭朴齊家校正仍命諸臣對策

王若曰書居六藝之一焉自昔有周之訓國子也教
之六書則先王之重文字也蓋如是矣春秋以上言
文不言字如左傳於文止戈爲武論語史之闕文中
庸書同文皆其證也然則文與字之并稱始於何代
何書何人何說而爾等可溯舉而歷對之否字之古
義近育不近文如易之貞不字詩之牛羊腓字之春
秋之使字敬叔皆其驗也然則字之訓文之由爾等
亦可言歟文象立而結繩移鳥跡明而書契作獨體
爲文合體爲字文有八象字有六類其製造之精義

可詳確歟指事之視識察見上下是也象形之畫物
隨體日月是也諧聲之以事爲名江河是也會意之
比類合誼武信是也轉注之同意相受考老是也假
借之依聲托事令長是也其究解之妙旨可極言歟
四象爲經假借轉注爲緯則同一六書而或爲經或
爲緯歟四象有限假借轉注無窮則同一六書而或
有限或無窮歟六書之中假借轉注偏多歧論以假
借言之則或曰借聲或曰因其聲借其義或曰借義
不借音以轉注言之則或曰轉聲或曰轉其聲注其
義或曰有因其義而轉者有但轉其聲而無意義者

有三轉四轉至八九轉者有轉同聲者有轉旁聲者有雙音併義不爲轉注者有旁音叶音不在轉注例者此其論果皆有據歟八卦爲忠古文爲質籀文爲文則忠質文何與於文字而如此分屬歟依類象形謂之文形聲相益謂之字著於竹帛謂之書則文字書固各有專義而不容通釋歟秦漢之更用八體今可悉數甄豐之刊定六體亦可歷舉歟梵也伽盧也季頡也竺典并稱之三人瑞華也花草也雲霞也後來變化之三體皆可指其得失歟橫則如長舟之截小渚直則如春筍之抽寒谷何所取象歟河雒開而

圖書兆嘉禾生而穗書始何所取徵歟大抵文字者
墳籍之根本詞章之宅宇言語之體貌也展卷玩古
則千載共朝削簡論今則萬里對面以之傳道述事
治官察民而凡天地萬物造化不窮之跡莫不有待
而資取焉大矣哉文字之功用也古文最首出而大
篆次之及秦李斯等三家之倉頡七章爰歷六章博
學七章所謂小篆也又次之自是而爲程邈之隸書
爲西京之草書爲橐書爲楷書爲懸針爲飛白皆名
小學至許叔重采史攬以下諸書又作說文解字則
後世小學之僅存者賴有此一部而已然以朱夫子

之地負海涵亦不免別求小學於曲禮內則之支流而洒掃應對習事居敬之說皆漢唐以上不傳之旨訣也此可謂發前未發有功後學歟唯是一種從事於六藝者往往考古證昔以文字爲小學異見崖論至今紛如何哉豈朱子之猶有未講歟抑諸儒之務奇妬新歟夫學莫大於格致格致莫要於文字予於文字之學雖未嘗專心用力而其於音義沿革之間蓋不無粗窺端倪者今予大夫平居讀書多識古文奇字而又當承命編釐韻書安得不發策求助補予格致其悉意敷陳毋拘程式予將親覽焉

臣對臣嘗閱夏殷周鐘鼎彝器款識及古周易尚書
孝經之文渾然圓樸皆具生生不已之妙非參贊位
育裁成輔相之聖人不可造也大凡天體至圓故天
之所生皆肖天而圓以其圓也不局不礙而生生不
已大而日月星辰細而草木之實蟲鳥之卵何嘗有
不圓之體耶故古之字體亦莫不肖天而圓聖王體
天以之考文則天下大治至秦而事不師古以吏道
易君道不惟燒毀六經遺禍後世六書亦隨而殘嗚
呼此天下之大變夫李斯慘覈人也師承荀卿之性
惡其心術蘊畜之猜險發之爲小篆削圓爲方背古

易俗以啓程邈徒隸之書邈獄囚也久係雲陽幽鬱
積中初造隸書曲折無漸稜芒四出日趨於謬三代
古文格而不行噫日之全規而變爲方匡月之半規
而易爲縱結則字體之倒置可類而推至若點如仰
釘畫如偃刀豎如立爻跳如倒鈎策如飛石掠如側
戈喙如倚槍磔如垂劍嗜兵之象尚戰之習一於是
發露向所謂肖天之圓生生不已者索然不復見矣
以此而行之官府施之士民垂之久遠世道安得而
不危人心安得而不渝臣以爲秦之亡不亡於胡亥
而亡於變易字體故暴秦亡秦無道秦虎狼秦之號

皆出於秦餘之士誦習孔子明於古書者之所爲也
恭惟我 殿下稽古右文建圖書之閣上應奎星園
曲之勢 御定奎章全韻分命臣等校勘編摩仍又
策問六書卽古考文之制也臣等敢不竭陳謏見對
颺明命臣伏讀 聖策自書居六藝之一止予將親
覽焉臣拜手稽首而言曰書爲百務之綱領萬品之
統紀廼所以列於六藝之一而兼該禮樂射御數五
藝者也徐鉉所謂八卦旣畫萬象旣分則文字爲之
大輅載籍爲之六轡先王教化行於百代及物之功
與造化均不可忽也者不其然乎逮周之世書學大

備以其非此無以考墳典之淵奧無以驗制作之程
度無以察天地之功用無以覺鬼神之情狀是故周
禮保氏掌養國子教之以六書人生八歲知思漸閱
精氣向旺其於六者與性相近遇物相親隨見而悟
逐聞而解誦之講之行之服之久而熟之觸類而長
之則習與性成若固有之卽之可以檢攝身心遠之
可以辨別事物處之可以玩牘名理出之可以經畫
軍民何則心細如髮不遺毫芒明析核綜無往而不
當故也書之爲功不其大歟漢承嬴秦滅學之後蕭
何著法猶有古意學童十七已上試諷籀書九千字

乃得爲吏又以八體試之郡移太史并課最者以爲
尚書史書或不正輒舉劾之當是時人莫不樂其簡
易而易知元元本本有原有委匪比後世詞章取人
終身不識六書者也蓋隸書雖行而兼通籀書者不
以今廢古也漢之文治幾及三代者有以夫然則漢
之賢良文學漸次至于二千石入爲九卿者皆以學
童諷誦九千字爲吏爲史者也茲豈非良法美規能
遵先王重文字之遺意也歟然而東京之末政廢教
弛斯文墜地逮于魏晉書學書法歧而爲二自茲以
徃習俗膠固莫可救解時君世王欲效周秦舉而措

之要在先正其心君心正則政莫不正六書之正惟
次第事爾伏願 殿下懋哉懋哉請因 聖問謹稽
故事左傳論語中庸所引皆是言文不言字之證而
同書文字始見秦皇之琅邪臺周易毛詩春秋所引
皆是近育不近文之驗而文形字孳亦見於孝經之
援神契不惟此爲然許氏說文序計原書則稱文數
解說則言字此又可見後世文與字之并稱也文象
遞于結繩鳥跡代乎書契此是劉勰雕龍之言而敷
衍易繫及書序者也獨體者說文之偏旁合體者係
部之成字八象不及六類不至則俱有假借之字以

之通變鄭樵之師心獨見有如是夫指事之上下人在一上人在一下各有其事可指而知也象形之日月取形圓缺象于篆體也諧聲之江河以水爲形工可爲聲也會意之武信止戈爲武人言爲信然戈是形而亡是音則原係諧聲而左氏之誤也轉注之考老考老也老考也其訓相互可息七巧之聚訟也假借之令長一字兩用聲隨意變也四象之爲經而有限以其主宰而無變也二義之爲緯而無窮以其推移而不定也假借轉注之說紛紜未定然借聲轉聲程端禮之言也因聲借義轉聲注義張謙中之言也

借義不借音易疏之旨而至若因義而轉轉聲無義者三四轉八九轉者轉同聲轉旁聲者雙音併義不爲轉注者旁聲協音不在轉注者趙古則之言也此皆有據可息爭辨其所論說繁不敢陳八卦肇於伏羲古文初於黃帝籀書著於周宣文隨世異則鄭寅之取譬於三代之三尚不爲無據書契之書文籍之文始見尚書序而疏云文文字然則文字書雖各有義亦容通釋秦有八體大篆小篆刻符蟲書摹印署書及書隸書新莽居攝僞司空甄豐改定六體較諸八體則數旣加二卽古文與奇字數又減四卽大篆

刻符及署爰二書也西域之梵印度之伽盧甲夏之
蒼頡出於竺典自居一二而稱頡爲季佛氏誕妄不
足道也瑞華花草齊武所造雲霞之書山胤所製皆
是六朝浮華之習其所得失何必覩縷長舟截渚春
筍抽谷取譬橫直不過藝苑之評品而引以說文類
函之誤也河驪效靈雒龜呈祥則羲卦禹範所以取
則羊頭嘉禾炎帝之瑞而穗書之作蓋出於此大抵
文字者墳籍之根本詞章之宅宇言語之體貌也我
思古人邈焉難覲則爲一展卷千載之久宛如昨朝
我思今人曠焉不遘則爲一削牘萬里之遠迫在面

前以之傳道述事則道存而事該以之治官察民則
官諧而民定凡盈天地萬事萬物莫不有待而資焉
至矣哉文字之妙用也古文首出而大小之篆分隸
之書章草飛白藝始多歧莫能歸一後漢許慎著說
文十四篇五百四十部本蒼頡之篇九千三百五十
三字則秦篆之全也其所載古文三百九十六籀文
一百四十五軒周之跡猶有存者而小學之傳不絕
如綫賴有此一書而已朱子別撰小學皆曲禮內則
之支流而灑掃應對習事居敬之說備焉或有嫻於
六書之小學者妄相譏訾何其悖也按大戴記保傳

篇古者年八歲出就外舍學小藝焉履小節焉蓋小藝者六書也小節者灑掃應對習事居敬之節也然則一切童學皆小學也六書之小學朱子之小學固并行而不悖既有大學之書則亦有小學之書而入於秦燒只餘古文籀文若干篇漢書藝文志始立小學家朱子之博聞豈不識此但補纂燒殘之小學故手定初本名曰小學之書可見其意之所在焉爾噫魏晉之間鍾王之流始以草楷相尚欹斜放縱惟取華媚悅人之目視六書如土苴繇也匪人固不足責而義之賢士何若是其違道至以洩嫂變爲便嫂攻

書之家踵譌襲謬迷不知改豈不慨惜或云草書出於堯舜之世則初造者合被四凶之誅旨哉言也亦有一種別撰之習莫甚於魏齊周隋之世而唐張參作五經文字唐玄度作九經字樣天下之文漸歸于一此蓋文字陞降沿革之大略也我東則新羅取士能試字林文學彬彬爲三國之最麗朝專尚科舉未遑六書粵惟我世宗大王睿智天縱字韻之學昭融一時數百年來士風不古人志未定字譌音謬日以益甚記曰衣而不識其名曰罔名者字也不惟衣爲然至如身體屬親宮室器用山川動植之類指而

問名茫然莫對其名者十居八九其不爲罔者幾希
矣甥訓喃也而稱之以妻之兄弟侄訓癡也而稱之
以兄弟之子趾本足指而訓爲踵也棟本屋脊而訓
爲柱也羔是羊子而呼以殺癰藿是荳葉而呼以海
菜徽以代貂榆以代筧勺以爲夕菽以爲太薺薇以
爲海棠連翹以爲辛夷揮周同義仍因并聲圖畐共
稱曹曹異用似此之類指不勝僂而廼敢用諸文詞
登諸章奏孰謂文明之世有此鹵莽之習也哉臣嘗
承命撰次輿地書地名之俚俗雖不敢擅改物名之
鄙野不得不釐正尤有感於六書之不明也臣愚以

爲字韻二書如鳥兩翼不可偏廢說文廣韻立之學
官以郭忠恕汗簡周伯琦正譌爲字書之羽翼以顧
炎武音學邵長蘅韻略爲韻書之羽翼購得善本翻
刻廣傳懸之象魏著爲程式使館閣之臣庠序之士
家塾之童塲屋之儒官府之胥吏委巷之學究莫不
戶置而人習朝覽而夕究形意事聲假借轉注犁然
覺悟昔之厭惡今焉暢洽昔之譏笑今焉悅服更讀
經史頓然改觀則螻之蚌屬不行漢人而販夫知之
笨之竹裏不藉武官而筵臣覺之夫然後疏章簿牒
功令簡牘一切文書舉皆形意事聲不期明而自明

豈曰少補然其明與不明寔係於君心應酬事物何莫非一心之造化而惟六書最近於心心正而六書之不明未之有也伏願 殿下懋哉懋哉臣竊伏念朴性源閭巷匹夫也其人已歿著述湮晦於是求正音通釋 御序弁卷仍命刻頒臣固感激欽仰 聖政之度越百王今又閱 御定奎章全韻字體謹嚴注脚該詳讀其義例通叶之韻華東之音井井不紊洵爲說文之階而廣韻之梯也佇見字乳生生不已之妙幹運於人文昭朗之會而考文之治格致之學將爲貽燕之謨猗歟休哉臣謹對

返夢菴上樑文

仁里篤天彝之歡兄及弟矣精舍釋靈夢之訓父曰
子今端居齋心恭瞻堂額伏惟返夢菴主人字曰大
器資非中材事直齋於一鄉正是父師一體爲心溪
之同姓奚徒民吾同胞苟新又新幸修齊之有志欲
孝誰孝歎就養之無期茲廼經之營之菟裘聊以優
哉遊哉邁軸青泥爲壁白石支柱南榮過肩潔茅代
瓦貞松揭櫬中霑容膝辰之良日之吉崇禎紀元百
餘年壬其陰丙其陽 獻陵迤北若干里聊占靈讖
於昔寢爰錫嘉號於新居思義顧名肖子服膺洞洞

緣想爲夢先考提耳申申爲昭代之逸民葵傾可效
作通儒之高弟茅塞何憂恭惟教戒之意如斯嗚呼
報答之心何已遊居寢處不敢忘也周旋奉持死生
契活罔或墜之鄭重歸獻僕望洋之歎坐井而觀願
得賢者結交不畱三斗之棘耻將世事掛念無用五
石之瓠接冲襟於秋軒古人幸見今世披素心於夕
牖一夜勝讀十年爰疏賀聯庸替祝史兒郎偉拋樑
東古戰場青濛濛丙丁年那忍說髮如虹冠欲衝兒
郎偉拋樑南用夏齋妥三龕拜遺像知爲那宣尼考
亭尤菴兒郎偉拋樑西峰之髻高雲齊落日烘仙

寢栢色驟變紫蒼迷見郎偉拋樑北山日光秀疑疑
先人衣履攸蔽春雨秋霜悽色兒郎偉拋樑上鳥孤
征而遠颺毳何潔翮何勁遲注目寄遐想兒郎偉拋
樑下十畝閒閒桑者朝又夕子衿青農舍側畔書舍
伏願上樑之後妻劬紡績子攻詩書熙怡瑞日祥雲
不知老之將至灑落光風霽月可與世而相忘

奎章閣臣等謝曬書日

宣醞箋

擬撰

曬秋陽以秘帙職忝龍圖霑需雲於初筵禮成狸首
所以昭德敢當序賢伏念臣等讀中秘書遭右文
王自慚地分之清切迥出尋常每瞻天章之昭回

昵近尺五茲當燕射曝書之日特許晉接觀光之儀
披金簡啓琅函日炙甲乙丙丁之部持雕弧破粉的
風鳴虎熊鹿猿之侯不料縟儀之新成遽蒙珍羞之
內賜九爵斯享遵宋帝之賜飲於鳳樓八簋旣陳慕
唐臣之預讌於麟殿鼓我舞我獻之酬之茲蓋伏遇
主上殿下武烈文謨神承聖繼聖人作而萬物覩煥
乎經緯之文元首明哉庶事康猗歟弛張之道遂令
內閣素餐之輩亦被御厨黃封之頒臣等敢不摘
藻詞垣咀英冊府飽馨香之至德薰蒸太和賁黼黻
之皇猷照耀文物

閣臣等進

御定奎章韻瑞箋

擬撰

竊以六爻八卦事物之至文無窮四等七音天地之元聲自在始知山川草木元無不字之形亦惟風雅典謨莫非有韻之語瞽史有聽音之訓保氏備教書之官寔爲蒙養之一端廼王政之急務亦多編纂之全副卽儒者之極工東京揭許慎之文統爲六書之淵藪南朝傳周顒之韻洵是四聲之權輿隋唐宋元之間譌缺相望孫呂劉黃之屬辨說難稽蓋緣文獻之莫徵益驗真材之不出不辨帝虎紛紛點畫之外譌莫識如猗滔滔音意之混亂繙經而句讀錯多所

迂於聖謨考物則名數差豈無損於王制恭惟 主
上殿下聲媿神禹之爲律道合皇羲之造書繹 英
陵訓民之音追述神智之肇初奉 高皇洪武之韻
緬思昭代之宏規誕敷同文之治爰降修書之 命
刪煩祛複庸期萬世之傳起例發凡將作一王之典
揭沈譜於編首採呂氏之書中原夫四般之音允爲
韻府之表準是以七家之撰同歸詞林之指南次以
切韻訓詁之編緯以字母開合之法古文全讀因互
見與通用井井列眉華韻東音遵聲解與諺經歷歷
指掌居其三者是樂韻均於七而爲歌腔呂生子律

娶妻清濁高下不已之妙聲叶天音胚地闕發收合
難測之微第次排以古叶之音尋常散在小補之帙
采剔墳典才老之淹雅可觀調協詩騷朱子之篤信
是驗未付各國之鄉語翻以我邦之士音三方縱是
侏儻不待南北鞮象之解中國最爲爾雅亦辨遠近
喉嚨之殊蓋分內外之篇更別古今之韻惟部次之
齊整統十二支伊工課之勤勞垂一暮歲快洗東方
三韻之陋足挽上古右文之休 寶閣揭奎章之扁
圖書充牣新編加韻瑞之目圭璧森羅伏念臣等莫
辨正音難識奇字體裁鄭重實仰淵鑑之昭臚列荒

疎空慚井觀之窄才竣編摩之役徒切兢悚之忱

測雨器銘

并序

測雨之器實創於世宗朝二十四年範銅爲之長一尺五寸圓徑七寸置之書雲觀每雨後以周尺量水深頒其制於各道列邑其法中廢先大王四十六年得其制於世宗實錄鑄置昌德慶熙二宮及八道兩都其創其復有可以見兩朝對時欽若之政也今上六年夏大旱諸邑告災畿甸尤甚珪璧荐舉靈應未普於是我聖上責躬求言親禱雩壇屏繳蓋御衮冕終夕露坐旣將事因以待朝歸御

鍾銜放歿囚以下情輕者是日郡人士女或有感激
泣下者曰聖上之爲民憂勤如此天豈不雨雖不
雨民悅之猶雨也日未晡甘霈果大澍及夜準一尺
二分是豈非我聖上至誠之所感者哉然我聖
上不自有猶憂其未洽命閣臣置測雨器于摘文
院庭中更占其得雨多少雨旣洽閣臣等莫不蹈舞
而言曰臣等近侍也其未雨也必先知我聖上憂
民之憂不敢不同其憂其旣雨也又必先知我聖
上喜民之喜不敢不同其喜是器也臣等之喜憂係
焉其敢不敬守而謹候也哉檢書官臣德懋遂爲之

銘曰王惟省歲頒測器仿彼挈壺刻箭植零霑漚澍
積累識謹眠羸減驗稽事

龍珠寺柱聯

庚戌九月華城之龍珠寺成承命製進柱聯十六句仍躬往監董

削剝以揭之

三千歲優鉢花長春壽國十萬種菩提子有秋福田

護聖殿

八萬四千法門同臻彼岸二百五十大戒共拔

迷塗

大雄寶殿

二萬里和訶國普沾石井功德泉八十頃

祇陀園遍開金地吉祥藥

十方七燈閣

結無盡喜歡緣常

住極樂淨土除一切苦惱想普渡大願慈航

極樂大願殿

鴈形獅形鵠形諸佛諸天千劫護牛乘鹿乘羊乘善

男善女一時聽

天保樓前

蓮花偈貝葉經不二門中天籟

香積飯伊蒲饌無量劫前地肥

天保樓後

兜率宮中稟大

偈普濟衆生般若臺上演真詮超脫浩劫

曼殊利室

直到

佛祖不知處祇是半塗且向父母未生前試道一句

那由他寮

雅亭遺稿卷之五

雅亭遺稿卷之六目錄

文

與族姪復初 光錫書

與內弟朴穉川 宗山書

與尹曾若 可基書

與李洛瑞 書九書

雅亭遺稿卷之六目錄終

雅亭遺稿卷之六

完山 李德懋 懋官 著

文

與族姪復初

光錫書

慘矣慘矣前月十七日事可勝言哉何以心溪之不
趣起廼年才踰冠喪其耦耶況平日其孺人賢淑之
聲聞於宗族也况吾宗主祀之婦人也哉况無一塊
肉以續後哉年貧矣衣衾棺槨諸初終之物且以心
溪之迂且疎奚爲之哉余不佞旣聞其訃到于今而
尚於邑竊想我心溪恒時心弱聞隣人之哭者未嘗

不惻惻泣欲數行下且日昏黑忡忡怔怔際此悲怛之境能不過情而憾否正如飄零偏仄之萼倏忽蜉蝣之衣衰旺死生之理如斯而已矣莊生之鼓其缶放矣無足談也奉倩之傷神君子罪之倘無中節之道否徒惻愴悲刻而已則奚以想大夫人哉心溪非不知也廼今懇懇不置者慮之也切故也葬日及地定之歟貧家之喪隨有無而已矣然其絕無錢財何不佞雖宗族也而不能蒲伏往唁是豈常理也哉我慈親值冬寒病患彌留不能一時離也心溪應知之哉葬若速營雖其翌日拂衣入生衢宗族相逢言談

優游以塞悲抱是其望也

秋雨浹旬令人支離遠想餘禾頭盡生耳也奴至拜
手幅謹審侍履清安慰豁良深其離羣之懷共秋氣
搖落城市猶然矧伊邈處寂寞之濱者歟科日薄如
隔紙多有惱心事旣望來此事應諧矣秋潦湔漢願
言行李慎涉稚川明五無蟄景止少瘳汝溫苦患毒
痢云先民有言字畫必楷正又有譏草書之放縱者
賢者札草恐涉狼藉字或難解畱心畱心哉
前書值出遊未覆日日鬱陶且信音濶者月矣昨獲
問札謹審秋深連以沉疴連綿今始巾櫛云始憂而

末少喜也又聞清州本家團會云想其樂怡怡也嚴
親月初南遊思親者懷與歲色垂垂深哉矧伊茲候
不寧熬煎熬煎稚川前月晦際歸陽厓明五往通津
景止亦南陽去焉於是同人俱落落矣祇吾也兀居
秋室讀中庸書吾與吾相守吾問而吾答也吾咏而
吾聽也恨無吾心溪子在傍尋繹也吾之口雖可以
吐出奇氣心溪之耳遠在三十里安得以入則受也
只吾之書猶可以照心溪之一雙炯然眸子也盍與
吾消遣冬之九十日如未也則有時寄我而文及詩
哉雖借人奇書以看而遠莫致之悵焉悵焉

延竚心溪十有四日眼欲穿矣今我將歸奈心溪不
來何近觀此宗人頓無前日逸邁之氣悔心秋萌頗
欲念學真吾宗之可賀也非吾心溪誰能導之正路
哉余嘗手摸夙興夜寐箴圖貼之壁願心溪每每勉
戒以得實效之地也年尚幼規模不深須可防其外
馳也

明日果歸心溪耶趁新年月圓而來是望德懋昨夕
宿果川店舍凌晨發程馬度銅雀水東方纔白云矣
陽厓雪中見稚川遠眺海上羣山談話移時而歸耳
困卧不卽逢耿耿

携同人五六輩遊三角之西僧伽寺寺北有石室天
劉中有白佛趺坐顴癭而口開老婆如也背有石障
刻大蓮花剝落纔辨文曰太平四年甲子蓋高麗顯
宗時契丹主聖宗太平四年距今乙酉八百二年西
巖有峰亘星荒碑獨豎道訛鐫符識曰妖僧無學誤
尋龍到此德懋咄曰安得一雙翅挿吾心溪之腋一
翥東北向拍手狂叫贊此古物乎

獲手疏濬暑歊蒸侍履佳相不勝哀慰自我先妣棄
不肖小子月已恰二圓矣猶能渴飢而飲啖焉且鬱
熱攻中思所以清涼之蚊蚤嘬膚思所以爬搔之鳴

呼乃忍能頑然在生人之列乎夫離合盛衰何事也
心溪應內記去年今日也粵惟三四少年子攻舉業
于獎廬時以望日有事于我王母廟餽也頗潔矣先
妣手具粉團角黍果苾之屬饋吾輩也而顏則欣欣
然悲夫今日不惟三四少年之蕭蕭而不合席不見
我慈母具時饌有事于王母廟自顧不肖小子纍然
衰服之中使二弱妹備時鮮之食廼反慟哭而拜奠
于靈座也彼粉團角黍果苾之屬猶依舊也何離合
盛衰之不相齊若斯之甚也匪獨不肖小子哽咽不
能言惟心溪其亦惻惻歟十日之雨何大注也實增

我無窮之慟禮云返哭必徐徐而行是日江寬夜迫不能徐徐乃反疾馳而失威儀耶距南城門才數弓禁鍾悠揚鏗然下鑰是時事可勝言哉仍寓于圯橋逆旅之舍夜稍深以飯羹脯果行初虞逆旅人忌客之夜哭奈賓主不相埒何我家君及舅氏姨弟泫然只婦人泣不肖小子作嬰兒啼咽咽而已翌明返哭于家連日行再三虞七月甲戌可卒哭是禮也體仁兄睦而仁義者也視吾家如親兄弟親叔父母病也審診之喪也歛襲之葬也穿窆之使悲惶罔措羸弱癡迷之少弟庶幾不大失禮儀盖其勞心幾八十日

德懋感藏于中心亦嶮岼不自安心溪之睦亦美矣
是喪也非心溪之曉暢節文以補我罅漏則可增益
其不孝焉自今以後敢不謹誦二人者之睦於我外
黨暨朋友曰體仁兄幹事而睦心溪氏知禮而睦云
爾乎世之族不族久矣惟二人者真族哉可不沒齒
愛敬哉昔有人借稗書于鄭錦南錦南以小學書一
部借之其人返送之曰此豈可以悅吾眸乎錦南笑
且悶焉余看科日之士只借東坡牧齋等集未見親
近小學者也雖有之但應講耳豈真知實踐哉錦南
武人也能矯或人之借稗家德懋雖無狀粗攻儒書

可不副心溪之真借小學也且心溪豈只應講者哉
德懋數月內欲讀是書庶幾不輕薄之歸姑爲心溪
先借之心溪亦讀一卷二卷必先送也雖然心溪自
以爲知癡叔乎何其以俗人之慳新不慳新論我歟
人有借書人必借之况族有書而族借之况吾有書
而心溪借之乎何其以苟簡之語嘗我竊不取於心
溪也

一水以間杳如天末手帖至欣不可言敬審大夫人
有不安節不勝仰慮德懋五月廿七日移家方其辭
古居彷徨躑躅淚不能量杯圈猶興愴况遊居寢處

之室堂乎天久不雨秋事可知奚獨野人安坐高堂
者憂亦不小也龍山之約秋甚好矣今日徐汝五餽
我圖書編恨無伊人在旁稚川自鄉來與景止日追
隨頗奇頗奇一爲來畱宿約也何無勇決欲營堂或
乘暇命奴伐置枯株如何

憶中執書甚愛政欲藏置懷袖間也敬審太孺人長
有不安節心溪將何以爲心德懋今月初九丁日行
禪祭先王制禮雖不可越然三年之體則具乎心也
若涉大川將無所攀援其觸感于外銷泐于中可已
乎哉心溪之所憂卽不佞之攸爲其何指揮之有大

欲發狂小則發病愚者恬然惟賢人可以調過心溪之所不能辦顧此頑适有何開明哉頽墮之病是係氣質弱細也然居閒尤甚旣吾二人知此病則若對坐相警如眈眈萬幕遠瞭烽火近警刁斗則庶乎清明歟從姊之婚在於今二十六日耳建堂未知在於何時伐木可趁其期何必勞心一筆雖禿可書心經笑領也

得手幅堪慰文辭之太露之謂深中余病然非不自知也譬如樹有花而實面有眉而眼天也花與眉其不先於實與眼乎結實開眼次第事也姑待之稚川

昨日歸卧南陽惆悵而已可言者俱載前書中縱有餘意奈又人速何諸字義列書別紙可按而睹也

綰染之綰虹蜺之蜺何義也案字彙元無系傍

宣字似渲字之誤嘗見畫家有重潤渲染法蓋施彩之謂也按字彙渲小水也蜺音顯小蛤白黃二種又小黑蟲也赤頭喜自縊歿號縊女元無虹蜺或誤見虹現耶

琢人曰貂璫貂璫是琢人之飾而在何處也璫充耳珠也又宦者傳秦漢中常侍叅用士人冠皆銀璫左貂明帝改金璫右貂悉用奄人爲之古今

注侍中冠以貂爲飾徐廣曰北方寒以貂皮煖額
附施于冠因爲首飾漢官儀貂蟬注應劭曰金取
堅剛蟬取居高飲潔貂取內勁悍外溫潤

萑苻是何物 萑音追爾雅萑推注今茺蔚又音

完易說卦傳爲萑葦幽風八月萑葦葦之幼曰兼
葭長曰萑葦苻音扶爾雅鬼目注江東鬼目草又
音蒲萑鄭澤名左傳鄭子大叔與徒兵以攻萑苻
之盜盡殺之

柳子軍中之用而何物 閱木部漏或是中國人
棒字之俗用耶問諸讀兵人則曰以堅木爲之中

空虛晝則飼馬夜則擊之有聲以警未知然否及見福建水兵節目每以木梆金鐸對舉應是刁斗之類耳

泚字拚字何義 泚同灤曲禮蔥灤處末石經作泚轉音裔烝蔥菹類也拚俗拌字音潘方言楚人凡揮棄物謂之拌俗作拚非又去聲義同通作判龜策傳鑄石取玉判蚌取珠

生日曰晬晬之義可詳歟晬面之晬字與晬日之晬同耶 晬音歲說文周歲也又音醉義同晬面之晬從目亦音歲日清明也又清和潤澤貌孟子

睅然見于面太玄初睅陸氏曰純也

緇何音義 音旬縫也又繞也

須臾出於何書 須臾俄頃也儀禮言不敢久也

又音勇縱臾與慇懃同又音匱古簣字草器也別

作簣蕒

舊年謝新年屈如流水相接間不容髮夫能人生遊
居飲食嘯咤笑罵於其裏不能濯舊愆以大波灑新
德以長風但見髮有華頰生皺可哀也已不知心溪
坐添一齒樂乎否德懋挽歲華而指點可悔可悲可
驚可懼者何其繁也茫然四顧如覺噩夢謹爲吾心

溪祝曰侍養多福字業加進眼中睡芒蕩拔無餘夜
夜讀書每至五更盥頰飲啖勿淹勿滯哉近日神氣
頗茶不可遠步少蓄脚筋可以謁墓其時相逢也
逢和仲以諦心溪平安狀又獲奉手帖日轉熱陪絳
帳動靜勝常慰心實多德懋叔母患風右臂不遂日
奔走醫藥焦熬何言且昨頭大疼減食方擺脫衣巾
委卧所示故事末由攷證祇待後日書中數件付托
事亦當謀諸徐氏耳隣貴朴進士之謂耶何貴之有
三月出寓於坊中數百步里人家邀我同研凡數三
十請果赴之凡十許日做科賦二首半而罷今謂此

事耶

隱麋二字是何義麋是何獸

字彙麋同麋說文

麋大鹿也爾雅麋大麋牛尾一角山海經尸山獸

多麋註似鹿而小黑色蓋麋皮黑而宜靴者也宋

輿服志曰乾道七年用靴以黑革爲之云則靴色

黑而用麋皮可知也李羣玉乞靴詩曰越客南來

誇桂麋良工用意巧裁成則直呼靴爲麋如呼鼓

爲鼉呼杖爲藜呼蠅拂爲塵之類也桂麋之桂意

地名桂州桂嶺之桂也隱麋之隱亦或地名歟亦

或如隱几隱囊之隱歟莊子隱几註隱憑也禮記

玉藻退則坐取屨隱壁而后屨註隱辟而屨不敢
向人着屨也則隱廩亦取隱辟而着屨之意歟

嘉樹蔥蒨豐草綠縟卽想巖居川觀日益清美德懋
飯沙磊磊門齒挫酸疊日苦呻腫血濃黃甚妨咀嚼
且奴病不能持馬而家君憂其步往今又蹲坐天下
事何其多缺也返夢菴上樑文初意逢着大器始欲
把筆細思之旣許大器則它言何可關心仍搆兒卽
偉以上而但返夢之義想來依俦幸略列其要以寄
斯便前所著返夢菴記亦可示之否秀野射飲之禮
其果行之否

疇昔書至出遊湖上未修謝書今憑昌輝口裏諦心
溪平安樣仍知今年暑氣雖毒不敢入靜者腹中不
佞與穉兒輩病暍泔泔苦事苦事前書所謂一人伊
人沒姓沒名張三李四不辨誰某尋思移晷粗占一
人無乃前日蒼栗園裏被酒淋漓時語次所及一段
某人耶如影如煙殊不歷歷雖然心溪愛我之至疑
忽闖生杯蛇亂真牀牛歸幻書法森嚴筆鉞飛騰以
吾弱綿且惡且懼瑟縮無光絕勝愈風之檄辟瘧之
詩洒然泠然裨我弘多然試評來書蜂屯蝟起摠是
疑膜嗟夫心溪者不佞之十年知心也慮從情起惑

隨愛生下語之際不諒微心十年之心溪疑猶如此
半面之某人交當云何祇恐螭蚓輩投間而起簧舌
萋菲心溪之疑愈徃而愈不可脫人來見我我往謝
之人泛語之我亦泛應之邂逅於宅室隨例酬答逢
着於道舉手一揖以此爲陷溺以此爲漸染排之斥
之有若塗炭衣冠者然心溪未免杞國之憂割席之
諷亦是隔靴爬癢奈何奈何但恨心溪之眼光不能
內燭不佞之心不佞之心光不能外燭心溪之眼黃
茅白葦彌望無際願借一炬洞然焚蕩不亦大快哉
世之所謂交道分數層節不啻千百以心溪之慧識

亦應揣摩醲郁矣世固有一見二見漬汚者矣亦有
千見萬見而不漬汚者矣心溪則真以不佞爲一見
漬汚者不佞真以心溪爲不真知不佞者昔人曰願
見一知己而歿嘗以爲激言也心甚薄之伊今誦之
諒非虛語心溪何不明言其人之姓也名也大筆論
斷祇含糊不發作藏頭說話曰伊人也一人也憚宅
人之知之也似亦是些子兒處世法也不佞之待伊
人亦用此等法也好笑好笑心溪之耳朶甚脆最易
搖撼昔者有隣貴之譏于今數年果探其實賊否眇
然一身每爲人疑訝間物痛自刻責而已不佞實愧

踰垣之潔心溪或類投杼之惑各自勉戒其在此歟
言甚絮煩揮汗數升只吐大略惟明日平心究竟用
意處勿令人見之也

五禮通攷今年從燕市來貯於內閣近日刑部尚書
秦蕙田所輯旣名五禮則亦另修喪禮與徐健菴少
有同異凡百二十冊其爲書詳悉可觀其直則不可
知耳士夫家未暇有之四庫全書踰十萬卷活字先
印其最要者二萬餘卷活字卽木字也其序卽詔文
也後當得送古之帙卽中國俗語曰套我國曰匣
悲夫本菴先生之奄棄後學尚何言哉斯文之統緒

士林之依仰將若之何慟矣慟矣竊想足下十餘年服事樑摧之痛其何堪耐如不佞者品材愚下雖不能執贊委身事之而平日眷愛亦云摯矣不覺涕泗之橫集職事縻身未由奔哭只自悚慙奈何奈何往見李鑄菴叙此衷曲而來耳史筌今日已進之矣

與內弟朴穉川

宗山書

南至夜得一律試觀之煮荳青煙翳夕林荒庭散步
竚君尋萬家燈白梅齊暖五夜雞長雪又深新曆黃
柑驚節物大音玄酒見天心不知雷起於何處清坐
寥寥一笑吟題曰至夜共明五賦明五者讀伴李氏

奎昇也修齊平治不獨堯典然也凡讀經史以大學
三綱領八條自頭頭叅究則幾乎得道理矣此法余
近始覺得比如天地間萬物萬事細究則陰陽五行
無不配了也

近觀一書有曰高不可欺者天也尊不可欺者君也
內不可欺者親也外不可欺者人也四者既不可欺
心其可欺乎心不欺人其欺我乎余於此三復不已
曰誠實工夫不忍獨饗持以贈君

或將古人格言涉獵看過愈於心心閑過而涵泳之
功每患不足蓋其稟受浮輕也力思其矯之之方而

已近得一談曰開明心術變化氣質此八字不泛忽須畱心也

君者方今之少年壯男子爾少陵有曰健如黃犢走復來正謂少年子矣一入場屋猶有三日委頓不能步五里之地此情其四體者也仲由負米買臣採薪其果冉冉苦欲死乎君較此等人則哺乳卧襁之呱呱者也我言非戲

今年頻下雪遺蝗入地麥豐可知且霧淞花皓皓滿林條亦穠兆也預爲田居者奉賀也君書有之曰誇大太過傷君子之言意文不可易而論也爾言是矣

噫噫余見多矣稍解嘲花弄月則已滿鼯鼠腹矣不知此外有無限好境何有得得揚揚自以爲奇男子哉大開眼者在旁玩則真蜉蝣蟻蠓蠅虱蚊蚋矣平生中元日之悲自今年始而最也從今以往雖百元日余之不樂自如也除夕余自書曰崑崙可移措於東南兒時之樂不可復也茲豈獨增賤齒之感也近日有一奇事心溪宗姪來宿樊廬張燭談古聖賢談已則復泛閱墳典各有輸贏夜旣闌燭落余手束縕取火煤灰栖髻復整頓接續未了書絕勝於張三李四閒是閒非也

凡當新歲必有大悔咎大覺悟未知如君妙年有何之悔之悟耶心溪有言曰非年食人惟人食年斯言儘有味願世上聰明子不素吞年光文章有悟處然後立脚勿以中郎爲末季怪品侮之齋心靜會必透得玲瓏實一轉眼則萬物皆吾文章也君才古質故以此救之然豈一切淫洄於是物流宕忘返也乎哉每當以此輩賓禮待之不可喚入我室反以主人事之也守株膠柱爲文之大忌惟君思所以轉活之余又噉一年猶舊癡奈何

君之科義果是斤兩文字而粵聞先覺攸訓科文奇

崛爲禁忌只纚纚收拾毛皮上過去余今春與數三等輩攻是文自以爲淺之又淺鋒稜銷挫而如元遜菴尹聖文張雲章皆是文之領袖見吾所撰以爲圭角太露決非禮闈中體裁余未嘗不懣然心服操毫更爲之猶依舊也於是笑而拋之矣今君之筆力奇古過於吾數層似非君所長也

殊鄉游宦頭無風味只有一段寄懷處堂名寒竹李凌壺大篆頗遒勁北窻下紫竹數百挺風來翛翛時把弟臂聯吟消搖良可樂也玄也能讀松也無病否阿川乃有此二雛吾安得不老蒼也

與尹曾若可基書

間者濶焉執事之顏貌話言只往來于中心尺牘之間先墜於案奉讀三四敢不謝而且愧先審執事之平安與隔滯之懷已而掇其讀覆紙面闔眼潛思曰不見曾若者旬且月我不得先曾若問曾若先我而問豈獨區區乎替面叙懷而止哉應必以古人之道勉我也吾將畢讀焉仍端坐更讀果爾心開目明曠然發蒙何幸鹵莽之質得此勸勤之諭執事既示我以古之人交道僕請言今之人交道以報焉今之所謂而金蘭而膠漆者徒以諧謔狎昵爲切磋琢磨彼

以謾語對之此必欣欣曰知心知心亦必以謾語報之所與酬應者女色博奕等事薰染之自以爲清致優游度日以至歲暮一不以道義相輔導過失相規箴萬一如執事者以古人之道箴之必展然而笑若風之過于耳甚者於心不平又強以謾語嘲之終不服也箴之者至于再至于三則隱然心怒仍與之疎噫噫交之道存乎交之道不存乎執事平日以我爲可友交益久而少不以謾語相加惟能講學問談文章如今又以文字警戒之規箴之不息焉於僕則可謂益矣於執事則未見其不損也僕雖譴劣亦能知

古今人交道之不同且受執事之規箴而不隱然心
怒縱與執事論交道亦不可謂不益也來詩敬審辭
甚蒼古亦可謂奇健愈往而愈變然詩未必每每奇
健亦時有溫厚可也尊兄察之

曾若莫以不頻逢嗟之但安置吾意內而不棄擲雖
十里猶對面十年猶朝暮遇也盈尺之牘亦足以宛
覲須眉靜接精神曾若空然下平地瞥眼之間添了
一齡復入北漢去於心快乎假使逃入蜀山中燒三
千里棧道陰平更設戍兵魚腹排虎鳥龍蛇之陣然
何來新歲月從天而降粘着渾身則元規塵猶可以

蒲葵扇障之此雖日萬洗沐不可少解脫我有一基
譜持獻足下以見在年三百六十日爲紋楸以吾之
才業之年紀爲對局人長以快勝年紀爲要法使彼
爲無心之着我才業則加十分力保萬全勢泉漲火
燒兔起鶻落大喝一聲我師得雋來年之局如此又
來年之局又如此雖百年我其日休矣進玉口含甘
露喫沾病樹待觀其溢現之花耶夫譽之病誣也居
然喻我曰袁曰鍾何其濫也縱令中郎更生伯敬復
出奈明文選無一隙地何某雖無狀其所立意與進
玉大殊異而亦無相關涉彼住山北我住城西不害

爲彼爲彼吾爲吾正如鼻豎眼橫紙白墨玄稻垂麥
仰鶴長鳬短進玉之言曰楚語齊語吳粵閩蜀語鄉
譚土音見在各殊此至言也誰知天壤之間有一進
玉生出來快脫文墨蹊迢奇奇怪怪淋漓縱橫手探
蛟館舌湧蜃樓吾固知雖日脅之以曹溪之棒雲門
之喝不少改也或譏其非平陸坦途而遙峰絕巔也
曰循危不知就安又以爲菽粟可長飽龍眼荔支不
扶人氣噫不惟人知之吾亦知之雖然今有人平地
立見二華挿天秀色橫蟠掩目而過曰危哉危哉仙
厨珍品羅列於前間之以脫粟飯掉頭珍品而頓頓

喫飯豈人情哉公庭爭訴之牒科場程式之券非進
玉猶可連車載也某主趣而欲靈進玉主氣而已幻
某全平不欲也全奇不能也故四分平六分奇時行
坦道時入深山進玉憤而拔鄙吝萌悶而滌塵垢囊
以衡霍裁眉爲蟻封彈丸愈矯激而愈探奇之不已
懸度鑿通無所不至其心亦悲矣某非鼎峙而異進
王者真不及而自異者嵩山如卧華山如立不害爲
山也壞裙化蝶百合花亦化蝶翩翩則一也稅侯休
屠人也漢人不猜之邛竹杖土蘆布蜀物也身毒國
愛之張三之砌植黃牡丹李四之池發青蓮花卽相

艷玩未必欲牡丹於池蓮花於砌也某與進玉其各
立意如斯而已何必猜疑攻戰又不可俯首聽命甘
心臣妾試語進玉惟我其知進玉也進玉之知我亦
如此不亦榮歟我評虞裳可謂金稱定星黃鍾真黍
進玉心猶不滿畫蛇足續貂尾掇拾古人名字而云
云非月朝評則點鬼簿凡曰如古人某勝於古人某
者皆紅朽之粟也進玉猶作套語耶其論足下詩雖
曰殊軌各具眼孔亦不相碍而任它自在何損於足
下古人有擬月以眉者又有以鎌擬者大小雖殊摸
寫月形月又自如

恭承惠牘頗慰索居詳審旨趣之趨善不覺歛容以
弟之百無一善鹵莽茂裂之資執事每愛而顧問不
勝慙慙汗出如漿然其爲人也甚迂疎固滯能知聖
賢與愚不肖之相去如天壤隔絕欲與古人爲期而
但生也晚踽踽以獨行漸未免乎輕浮興言及此面
鐵十重愚豈無其中而只緣飾其外以言此哉實有
天地鬼神昭布森列可質其心矣執事之心其亦良
苦愚豈不竭誠以告哉人生日用莫不由於五倫此
豈異常難行之道哉只在乎隨其當然之理而已惟
讀書可以進書豈老莊班馬之謂哉要不出大學小

學其它聖賢之書皆可以開心進智惟執事勉之勉之愚者之言猶一二可取者也

菰蒲中奇士往往伏而不出者多耶吾輩平生搜羅古初之奇書反不知現在之騷雅訪以爲師友真睫在眼前而不見者也虞裳之什淹博而不濫幽奇而不僻超悟而不空裁制而不短且筆氣蒼勁日記短幅碎爛處逸態橫生定是人外物也

得奉前月初十日手牘一尺論懷對面千里良足慰心回想十年前後兄髭未生弟頰不皴書圃藝林魚魚雅雅不離時月以期皓首不意近者或策馬於幽

薊之野或揚舠於南海之波合并難而睽離易昔如
淵中之魚鬐鱗相聚今似雲間之鳥羽翮分張去年
今年皆如此亦不知明年之又如何也每一念至不
勝惆悵弟靜居茅齋咀吟書堆裏日作蠹魚生活可
謂得享本分之樂而但老親旅食海濱菽水不繼有
愧林烏徐公多病有時弄敗筆作墨荷花以寓其寂
寞之情冷齋審中望見滿洲皇帝十五萬騎而來可
謂壯觀楚亭時時過從把臂論襟鬱悵悲咤不得耗
磨其奇氣奈何醉雪翁奄然觀化嗚呼九十窮餓潔
身而歸可謂完人後生小子何處復見斯老哉玄川

元丈暮年薄宦久而不調買山之錢去益難辦吾輩
之窮胡至於斯大抵此丈溫厚清直堪爲後生標準
但惜其知者甚鮮而鬢鬚純白衰象日著也卽吾兄
童子時函丈似應觀感者深故不覺稱道之娓娓也
兄之足跡幾遍新羅之墟何其壯也讀其詩可攷矣
竟日人行紅葉裏黃昏寺出白雲中之句縹緲乃爾
與楚亭輩擊節誦傳耳

與李洛瑞書九書

雨屋張燈讀楊鐵崖詩道勁快宕萬曆以後才子真
如紗幮蚊音

自聞足下托不佞以藏書使之手筆校訂評點喜而
不寐不佞十八九歲題燕居之室曰九書齋曰讀書
看書藏書鈔書校書評書著書借書曝書不意十年
來與足下名字相孚定匪偶然嘗作九書齋諺曲今
遺落不記矣沈蕉研嘗手點陶谷相公所藏書亦托
不佞校點其二十一史此皆能得古人典雅之遺意
也歲旦新祝曰足下多獲奇書慧識日進不佞身閒
無病窻暉常鮮夜燈延輝而已閭閻耆舊看翠子李
壽益金剛記中道得朗善君故茲送之
適有餽我日本妙楮試洗研搖毫欲檢古人佳事書

之回思同姓同閭同志之好者無如足下與不佞也
足下旣藏我小尺雖紙如蜨翼字如蚊腳者俱惠之
我當鈔謄以敦情誼

家中長物只孟子七篇不堪長飢賣得二百錢爲飯
健噉嬉嬉然赴泠齋大夸之泠齋之飢亦已多時聞
余言立賣左氏傳以餘錢沽酒以飲我是何異子輿
氏親炊飯以食我左丘生手斟酒以勸我於是頌讚
孟左千千萬萬然吾輩若終年讀此二書何嘗救一
分飢乎始知讀書求富貴皆僥倖之術不如直賣喫
圖一醉飽之爲樸實而不文飾也嗟夫嗟夫足下以

爲如何

得婆城趙敬菴書勸人爲學藹然可念世俗浮浪之子聞小學二字則反唇以詆見近思錄欠伸欲卧赤憎赤憎足下慎勿視作茶飯說話可也

日本摹刻嶧山碑篆家以爲稀有華嶽廟碑隸中之烏獲任鄙對之森竦可怖急雨麤沙泚泚露出折劒摧鏃想像其穴壯士之胸春悍將之喉足下其細玩之

鄙人之於甘也如狴狴之於酒也緩之於菓也凡吾同志見甘則思之有甘則貽之楚亭乃忍三度當甘

不惟不思不貽有時而偷吃他人遺我之甘朋友之義有過則規願足下深責楚亭

不佞嘗以爲朝鮮有三部好書曰聖學輯要曰礪溪隨錄曰東醫寶鑑一則道學一則經濟一則活人之方皆儒者事也道學固爲人根本之事尚矣也今世專尚詞翰於經濟蔑如也醫者之術其誰明之千古有二段佳話陳明卿纖峭之詞人也拳拳經濟王子安輕佻之才子也曉達醫家不佞於二者未嘗不異而愛之今足下湛靜明慧有資有材年亦甚富若不專治詞章每常眼筋心影湊泊於此等實心愛物之

事庶無虛活此世之歎如不佞陳陳太倉之紅粟何足道哉此二冊奉上雜拔三冊以賜母重複前閱恭玩李伯時畫石搨先聖像及七十二弟子像子淵豐下未必貧天子贛癯頰未必貨殖顏魯之顏猛如樊噲樊須之鬚可謂繁鬚梁鱣持鱣又何意也無乃伯時遊戲神通之筆邪然冠服古儼想當尔尔不必苛求其髭髮也高宗作讚若后子里樂子聲之屬苦無事蹟彌縫苟簡殊甚冷淡反不如伯時之放筆寓意也韓魏公北嶽碑廟撰并書渾樸典整真大臣也書脉從魯公來而但肥且雌耳王元美曰鋒距四出

不可正視非至論也亂時之節臣治世之輔相觀其筆蹟可以知也

古有傭書而仍讀之者僕嘗笑其太劬今忽自蹈幾至眼眇手胝嗟乎人固不自量也留溪外傳首卷奉贈燈底一讀明早朝還之此皆孝子忠臣烈妻畸夫毗益世道之書每讀甲申之際目淚浸淫骨青而膽寒也

有人饋吾以素冊者置研之北蕭閒岑寂時讀書之心油然而生雜拙古人得意文朗然而讀急磨墨書之不計世次心甚樂焉伊時雖佳酒美花無以易此

好也今忽憶李獻吉文欲錄置一二首送之也蓋余七八年前所讀者也說郛一卷還送之也不佞昨自南漢歸泓濤沅沔秋夕之際尤難爲懷者不獨山陰道上然也

水色集不書姓名非掌故者不知其爲許功臣猶且作序者不書姓名意是許筠也剗剗欲不朽而反藏其爲誰某東人之鹵類如是可與知者道欲選山海經文乍贈如何演蟬送去似是足下筆也

不佞雖非學者每愛重近思錄常置身邊日夜看得四三條暗自警省實不欲頃刻脫手而足下所請安

得不遵凡九冊謹送送此則無可對眼之冊元文類
或宋詩抄二部間其一惠借如何

歲新人漸舊君子宜崇明德不佞歲改以來不爲人
客則人爲我客未得偷閒一相逢悵悵窻日暄而研
冰釋欲尋舊課全唐詩替送爲妙輪回梅二詩還送
如何

日知錄苦心求之經營三年今始細人之秘藏讀之
六藝之文百王之典當世之務訂據明析嗟乎顧寧
人真振古之宏儒也顧今世匪足下誰可讀此匪不
佞誰復鈔此四冊先爲持贈寶玩如何前惠小冊寫

已填滿願足下續惠之成我此鈔

流年鼎鼎朱夏又屈不從足下談經討史只緣不佞
狂顛痛飲千株桃花之中不爾則杜牖飢卧讀貧士
傳箋注於陵家李蟠字耳諸韻士詩卷送去一覽而
還之

昨日同在先往會龍村林丈人於墨溪丈人疎朗溫
和愷悌人也語次稱李洛瑞未嘗不三致意焉時會
者十人而詩者七人丈人苦勸余吟余辭不得今茲
書上丈人之言曰科舉商賈也文章異端也仍相與
飲酒樂而罷今日飄然向羨湖去矣澹園八咏還送

可也夜中借茶知足下有病患今日痊可否

以不佞之懶散安得日趨于字典之閣檢閱許多字
乎昔同春宋先生必借人書勸讀人還之書若不毛
且垢先生必責其不勤學更與之借焉有一惡少借
書不讀將還之恐被責踏摩其書假稱熟讀足下學
宋先生之忠厚可也況不佞非踏摩之惡少乎

麗末諸公中能嗣唐響者圃隱先生然繁麗少遜於
益齋奇健不及於牧隱大抵益齋是元調牧隱是宋
體何嘗有圃隱裊裊綿綿之態致耶又有名家迭示
爲妙

古者閉門讀書能知天下之事然不可不問於博
極者足下可謂能知本矣當先徃待之李公要見父
菴輿地欲袖示之送之如何

春秋列國百廿四國多一字號而或有二字如小邾
南燕而此書連書之不盈本數幸另定二字以盈本
數以送如何

元泰定帝分天下爲十八路不可考幸於文獻通考
及清一統志沿革考出列書之以充十八路卽今惠
送如何勿以爲勞

僕竊以爲中原元氣之所萃故日月不旁照水土鍾

其和聖賢之淵藪而文獻之亭毒也安南故交趾之
域也距燕京萬有餘里歷世文物鬱然可觀琉球海
中之一彈丸也然遣子入學自明至于今勤勤懇懇
丕變夷風此皆僕考檢典籍獨自歆美而人所不知
者也惟我朝鮮箕聖之所避地而距遼東千有餘里
典章禮樂爲四夷首較彼交趾琉球其爲文明顧何
如哉故歷讀前史外夷列傳朝鮮爲第一其次安南
又其次琉球匪謂其強圉列序其文明也故崔致遠
金夷魚金可紀崔承祐貢墨於唐朝至今照耀朴寅
亮使宋而名滿天下徐兢著高麗圖經而金富軾特

列世家降及胡元益齋李公奉使西川降香江南稼
亭牧隱父子登制科至若我朝開國與皇明并
起使价頻繁式無虛歲延至二百酬唱之盛觀感之
摯可謂至矣然反不如三朝之極盛爾

墨莊先欲贈我佩文詩韻我辭之請以韻略韻略稀
貴琉璃廠二十餘書坊求之數日始有此本其情誼
之敦厚有感也行忙未暇見之足下先曉其凡例吾
輩有韻之文皆爲金條則潘公所謂有關文運者恐
非虛言

統志蒲州所謂箕子墓不過引蒙縣箕子墓匪別有

墓於蒲也天下凡謂箕子墓三一則蒙縣一則平壤
未知其一在於何處也

拜帖以諦近間起居珍愍昂慰何已鄙人豹直摛院
日寫近萬言手指麻木矧又客使渡鴨水祇隔旬餘
爲供頭目明將還縣勞薪如此浩歎奈何紀年兒覽
方在徐直閣第其他皆在縣衙祇將蜻蜒國志二冊
奉呈

地志草看詳一番可謂盛水不漏而名宦人物實難
評議鄙之淺見以爲一遵勝覽載錄又細櫛三國史
記高麗史勝覽遺漏者一一補編又從磻溪地志若

崔煙村之流鈔載以明宗朝爲定限而宣廟以後則姑闕之以俟從便區處勝覽所載者若有疎略忒甚略攷信書添補至若孝子烈女亦依明史之例已有昨日面議輿地係于史流須十分審慎是企人生離合如流水浮雲初無定局而未有劇於今春之分張也不佞幸無疾恙而自前月又復勞薪於武藝圖譜之役匪久雖可竣事仍入內閣校閱御製柳寮亦以此役不在輿地之局耳府下士人李仁燮卽不佞袒免之親也曩者蓮洞將臣之爲寧邊仁燮以其孤子無依仍作本府鄉人贅壻今雖產子女永

爲遐士之氓寧不可憐卽須存邀見隨事曲護俾
其出入衙中以爲依藉之地幸甚且其人頗謹拙無
他才具雖親近必無依勢作弊之端故如是深托焉
矧又不佞之族姪爲貴府之部民亦係稀有之事也
又聞吉銜者爲前官之別監坐事囚係於府獄云雖
不知所坐之如何而其祖故別提仁和卽關西夫子
也以鄉薦除官辛壬誣獄起棄官而歸因有一詩曰
先祖當年注書退辱孫今日別提歸敢言 聖世知
幾去却憶鱸魚秋正肥 先王朝召見其孫衍 誦
此詩而嘉獎豈不盛歟銜之罪旣非元惡大憝則豈

無念舊曲宥之道耶亦須論報營門從近勘放使賢人之孫保存其家業如何

荐拜惠書且披且讀何異握手促膝譚言娓娓矧審每吟和陶之詩不作弔屈之賦任運騰騰騰騰任運爲之欽誦不佞又當編韻之役櫛字查畫細入毫芒天氣向暖心力易解不勝煩惱自顧孱軀百體僅具而所恃者行年五十巖電燁燁香祖所謂異人眼睛自編韻字空裏眩花諒非細故近者令公之量移蓋緣輿志之易就雨露霜雪莫非造化書中許多所教商議閣中諸公則大槩咄歎其著手之稽滯而內閣

書籍不可擅送鄉野地係左輔稍移便近事甚適宜
既在謫籍未必如是毫煤絲欄如例給備云其言未
爲不可今示四難不待令公之言而已預知之矣略
略修纂以待他時極意了當似是次第事耳第從平
易條例火速起手如何人物名宦等所定方略可謂
得體以此定之如何人物考內閣所貯爲二本從當
議請於閣臣而未可必此事恰如徐憺圃放歸田里
摠纂一統志何其奇也莊陵志亦非至今延拖者
亦非他人所可擅改何畏其太守也其書盡在沈待
教家以其改修配食錄也亦當索去校閱耳配食錄

考據詳明堪作不刊之典以此修正則省力於本志
但草藁秘不出奈何京都志在於閣中當收拾出送
黃華旅稿恣意評騭敢不如教復續十餘年前事詎
不欣然

全韻草七葉先托秘省校閱遞傳于郝中必須看詳
注脚如有紕繆爲之付籤期於簡明安望其盡善也
若得事半功倍之術當免頭白汗青之誚如何如何
半日可以勾當送評則卽須出付以爲輪回諸處不
多日竣工豈不快哉空缺處略略填滿無至推退割
付之境也輪看次序先送秘省次執事次柳次朴次

內閣次李令公紡車相似不可暫停七葉今送朝前
覽訖如何

今來五葉只有二籤左右其倦矣乎俄有內閣之趣
而諸處遲速不一悶絕昨問三字義意不明白可鬱
灤水有二而一明一暗從遼西水名似好耳瓊叟見
邯鄲淳藝經有曰——今之骰字也勢字訓今其葉
不在當更考左右之校書精切更無其敵而柳惠甫
接武探覓捉得左右之所未覺非惠甫工於校書大
凡校書妙理無涯也又十二葉換送并前葉逾六十
二兩日可竣工城市全圖金剛峰詩奉呈耳

從憑之從當訓勸也從憑而今此韻例憑字旣訓勸也云云從字又有驚也之訓則從下不必疊訓勸也假令從無他訓則疊訓勸也云云餘皆倣此洵溶之溶果是誤書洛卽降而河內水名與洪水全當商量改正劇訓之誅也刑也當易置葵下只訓椎也業欲刪之未果假令訓終葵亦不緊要既有本意則未必添書此等訓以其似於韻府所編文字也葵下當書姓也云云凡姓名之訓姓也人名云者其爲音因人姓名而另具一音若丐俟食其之類也葵則只是一音不必特訓姓也庫訓云云此係義例若無人可稱

則只訓國名湄訓水草交甚近正當改正一字之別
見他音者互註兩音如釭音之江降也又如我音全
而母義有異者字義全而音母有歧者竝本註下界
圈別註匪圈無以別也黻下殿餽下既有餘地當添
註至若餌下耆割付者誤矣匪餌乃底此等處發摘
如神令人不覺洒然如冷水澆背但訝明公捨不得
翁訓鳥頸毛至曰恐未必駭人目以其出於說文急
就云何公之不諒物情若斯之适也鳥頸毛出於二
書乃所以駭人目大凡甚麼說文何物急就又况那
箇鳥何與於我其不艷然大怒曳笏却立者幾希矣

且千萬字皆具本義若逐字訓之則是不下訓花跼
焉下訓黃鳥然後可謂窮源然有誰知之要明公一
場噴飯胡盧爲發諧語耳今來五葉所校一切改正
可謂昭然相契

以詩歌賦咏笑

雅亭遺稿卷之六

終

德山文集
卷之六



卷之五

五